

## ROM DILAG NAI PAULUS YOM

### *DIG MAKNU NAI*

<sup>1</sup> Da Paulus, da Kristus Jesusnu udat danab. Nug da total daakulnu otida amu Kayaknu Nai Ena mehuqkulnu ele tituanidom. <sup>2</sup> Nai Ena amu anuka Kayak Nug nai qaka a, nuhikud propet ag aon, Kayak naipa yaaeg noum. <sup>3</sup> Nai ena amuam Kayak Nug beka, ihinig Nadi Jesus Kristus, nuhignu nai. Nug wan imupan menuakpa amu Nug Dawit budubpa aaku doum. <sup>4</sup> Nug doa, ad emaitakpa mauhe, Kayak Nug gagatag nuhig okaipa he, Nug edua hibaitowa, dimpa Nug Kayak Oudi me neum, keeke adit amupa amu Nug am genab Kayak beka daate anidta dootem. <sup>5</sup> Kayak Nug Jesusnu udat okaipa da Jesus onig humakulnu, Nug nuhig ehanitak okai hamu megte, amu meda, Nug da total danab ele daakulnu otidom. Nug da danab idu idu oh ag nuhignu oolagpa genab doon, nuhig nai dim lamidkulagnu onilagpa ekulnu anam heum. <sup>6</sup> Amu ag Jesusnu danab ag Rom daateb ele amu ag ele am Jesus Kristusnu ewak baag doon dim lamidteb. <sup>7</sup> Amu da Paulus, da ag Rom danab, Kayak ahilagnu oo mauhe, ag danab nuhikudnab daaglagnu onilagpa eum ele amu, da ahilagnu yaatem. Ag Kayak, ig Mamenig, ihinig Nadi Jesus Kristus ele, ahilah ehanitak okai hamu megtep amu ahilah madod ele ahilagpa daaglahnu ool daate.

### *PAULUS NUG ROM ANADKUNU OO DAYOM*

<sup>8</sup> Aria tatam da ahilag ohnu Jesus Kristus onigpa Kayak dahil amegpa, “Ena heme,” awe atem. Adinu? Ahilag oopa genab doyaknu amu danab wan atu ohpa ag aegeg

dooteb. <sup>9</sup> Amu Kayak, da hanhan nuhig udat gagatag hein, Nug Bekanı Nai Ena mehuqtem ele amu, Nugnab da nai yaatem imu am genabib yaatem doya malom daate amunu da iiku yaatem. Am inam. Da haen oh unuqitak dahilpa ag onilag diie, <sup>10</sup> Nug oo dayeb amu da ahilagpa gemu gokulnu ib laa ha medakunu haen oh Nug od medtem.

<sup>11</sup> Da ag anadkulnu ool okai daate. Amunu diig am, da ag Kayaknu ehanitak ena, dahilpa daate ele amu madapi, ag oolag gagatag aqakunu ool daate. <sup>12</sup> Da inam dab metem. Ahilag oopa genab doyak da ehanideb amu dahil oopa genab doyak ag ehanadkunu ool daate. Anam dayeb amu ig oh ehanitak ena aognig. <sup>13</sup> O lailad, da ag imu doon autna aoglagnu ool daate. Haen kudum da udat dahilpa, da iita adi danab laala ehanati, ag ele Kayak baekudpa daateb amubia da ag Rom daateb, ag ele ehanadkulnu ool dayom amunu da ahilagpa gokulnu dab memi amge haen oh keeke laa nug da ipul oo neum. <sup>14</sup> Amu Kayak Nug da Grik danab amu danab laala ele, doyak danab, danab doyak iita ele, ag oh ehanadkulnu udat medom <sup>15</sup> amunu da ag Rom apa daateb ele ahilagpa Nai Ena mehuqkulnu ool okai daate.

<sup>16</sup> Da Jesusnu Nai Enanu amu da uda nak ii dootem. Adinu? Kayak Nug nai amupa danab aun adi ag oolagpa genab dooteb ele amu, Nug ag edua diite. Juda ag tatam doyegeg, iita adi ag aaku geha dooteb. <sup>17</sup> Nai Ena amupa Kayak Nug ib atenpa ihinignu, “Danab tutuku,” akunu ipunigte. Tutuku daagnignu ib am oopa genab doyak aakuib. Ib laa iita. Kayak naipa yak inam daate amubia. “Danab nug oopa genab dooku amu geha Kayak Nug danab amu, nuhignu ‘Danab tutuku,’ awa ab, danab amu

nug bauklel awa daaku,” awa ate.

*DANAB OH AG KAYAK DI MEDAPIG*

<sup>18-19</sup> Adinu ib laa ii daate? Kayak Nug hab atan he, opodi bak, Nug danab dilag hipuninnu doote ele amu, opodi bak amu aaku miag atiom daate. Yo, danab ag Kayak Nug atem daate, doyak amu oh amu lokumak ii daate, Kayak Nug nuka ag ipuanate, doyak amu ahilagpa miag atiak daate amge ag ii dim lamidteb, diig amunu ag Kayaknu kobol ena di metan, kobol nau hena, ahilag kobol nau amupa ag nai genab qeeg nete amunu Kayak Nug hak nau ahilagnu opodi bak doote ele, Nug amu he, miag atiom. <sup>20</sup> Kayak nuka nuhignu ag ipuanatomnu amu anukanab Nug keeke oh hatom, haen amupanu udie gemu ele danab ag Nug keeke hatom am anidteb, amupa danab ag Kayaknu kobol laala, danab ag ii anidteb ele, amu dooglagnu elele. Amu ag genab Kayaknu kobol diig anidna amu nuhig gagatag nadi hanhan daate ele, amu ele anidpig amunu danab ahilag ehed hak lokumidna, ag anen anen, “Da ii doomi,” akulagnu elele iitanab. <sup>21</sup> Amu ag Kayak doopig amge ag Nug am Kayak oolagpa genab ii doonna, ag Nug onig ii humana, ag nug amegpa, “Ena heme,” aon ii apig. Iita. Dab mak ahilag kaakanab daye amu ag oolag ootot aqe, gatatu manom. <sup>22</sup> Amu ag hibguita hena, “Ig am doyak ele,” apig amge ag kaakanab aqe, <sup>23</sup> ag Kayak ii mauhte ele di metan, baula Nug binag ii mepig. Ag baolina, danab mauhte ele dotog hena, ai dotog hena, dod laala ele dotolag hadna amu mat keeke dotolag ele hadna, binalag mepig. <sup>24</sup> Amunu Kayak Nug uuate, ahilag dab mak nau amuib dim lamitegeg, kobol nau amu eedateg, ahilagpa udie, ag gapai kobol nau hena, bedulag heeg nauhom.

<sup>25</sup> Danab anam amu ag Kayaknu nai genab uun baolin amu ag nai ham bupuak aopig. Amu ag keeke, Kayak Nug hatom ele, keeke amu binalag mena, ag Kayak, Nug am keeke ohnu diig daate ele amu, ag Nug di medapig. Kayak amu ig hanhan Nug binag metu! Genab. <sup>26</sup> Danab ag anam ehed hepig amunu Kayak danab amu uuate, ag dubutid kobol oopa daapig. Ah ag danab uuadna, ag nug awak kobol tutuku uuna, danab ele iita, ah lailkad ele gapai hepig. <sup>27</sup> Amu danab ag ele ah ele nug awak kobol tutuku uueg, ag oolag ab ditiak bia huana ahe amu ag danab lailkad ele gapai hepig. Danab ag uda nak kobol danab laa ele anam hepig. Ag aka anam hena, nob nau ehed hak ahilag amunu elelepa aopig.

<sup>28</sup> Laa ele amu ag Kayaknu dab mak adan oiglagnu uupig amunu Kayak Nug ag ahilag kobol nau amuib dim lamidkulagnu uuatom. Amu ag kobol nau, danab ag hekulagnu elele iita amu, aaku heteb. <sup>29</sup> Amu ag kobol tutuku iita diigdiig, kobol nau diigdiig, en oh ib nau diigdiigpa awak amu gapai hak diigdiig ele heteb. Ag danab laa nug keeke ena ele daate amu ag nuhignu oo aeg bak dooteb. Ag layag keked meta dug wak kobol, nai hak kobol, layag bubuitak kobol amu layag he nauhak kobol ele, ag kobol nau amu oh henan daateb. <sup>30</sup> Ag layag dimug matiak, layagnu nai ehed anak, Kayaknu nau, ninig ele doyak, laa dilagnu ehed doyak, ag aka binalag mak, ag aka bedulag humana amunu nai matiak ele heteb. Ag kobol nau bau diigdiignu dab mena heteb amu ag anilkad mamelkad odelag tapaeg nete. <sup>31</sup> Amu ag am doyak iita ele bia heteb. Ag aaku nai qakan ateb amge ag ii dim lamidteb amu ag lailkad dilagnu ele nug ehanitak, nug oo meta oo mauhak ele ii heteb. <sup>32</sup> Amu ag Kayaknu do

ena tutuku, nug danab ag kobol nau amu heteb ele, ag mauhkulagnu ate amu ag dooteb amge ag kobol nau amu hekulagnuib oolag hete. Amge anamib iita. Danab amu ag aka hekulagnuib ii heteb. iita. Ag danab laa kobol nau amu heteb ele amu ag binalag meteb.

## 2

### *KAYAKNU EPEDIK AMU TUTUKUNAB*

<sup>1</sup> Amunu na danab na laipad epediadna, ehed hepignu nob nau aoglagnu atem ele amu, na am atemun? Na ele ehed amu hetem amunu na Kayak noobpa, “Da hemi amuam da bedulpa iita,” akutnu elele iitanab. Na laipad epediadna, ag ehed hena, nob nau aoglagnu atem, haen amupa na ele ehed nahipnu nob nau aokutnu, na naka na bedun iite yaatem? <sup>2</sup> Na naka na anam epediak pehetak ii hetem amge ig dootem, Kayak Nug anam ii hete, Nug danab kobol nau anam heteb ele amu, Nug ag nob nau tutukuib madate <sup>3</sup> amunu na danab, na laipad laa kobol anamnu epediadtem ele amge na ele kobol nau anamib ele hetem amu na atem dootem? Na naka Kayaknu hetodiak edidna oolna gokutnu elelete? <sup>4</sup> Kayak Nug nahipnu ha auta awa, amen mak haen elab daya, Nug nob nau paha ii medte amu na amunu keeke hamu biate dootem? Amu na Kayak Nug na oot edukunu oo daate amunu Nug nahipnu kobol enanag hete iite dootem?

<sup>5</sup> Kayak Nug na oot edukunu oo daate amge na naka na oot he itue, na oot ii edute. Kobol amupa amu na naka ehed hak nahippa opodi bak, Kayak Nug danab dilag hipuninnu doote ele amu, na amu huana aku qag metem. Yo, ded laa opodi bak, Kayak Nug danab dilag hipuninnu doote ele, amu miag atieb, Kayak Nug nuhig kobol tutukupa na epediteb amu na geha nob nau aokut.

<sup>6</sup> Kayak Nug ge<sup>h</sup>a danab oh kobol ag hepig ele amunu nob elele madaku. <sup>7</sup> Danab laala ag Kayak ele hab atan ena daaglagnu, ag binag okai aoglagnu amu ag bau dayak ena aoglagnu ib matiak udat gagatag henana, kobol tutuku heteb amu ge<sup>h</sup>a Kayak Nug danab amu bauklel hanhan daaglagnu madaku. <sup>8</sup> Amge danab laala ag aka ahilagnu dab menana, ag nai genab amu di metan, kobol tutuku iita amuib dim lamidteb ele amu, ge<sup>h</sup>a hipuninnu bu aqak, Kayak epegpanu udite ele, ag amu aona, ag nob naunab aoglag. <sup>9</sup> Danab oh kobol tutuku iita heteb ele, ahilagpa qagaitak okai, guitak okai ele beku, Juda ag doopeg amu iita adi danab ag ele dooglag. <sup>10</sup> Amge Kayak Nug ge<sup>h</sup>a gagatag ena, binag okai amu madod ele danab oh kobol enaib heteb ele madaku, Juda ag matowa amu iita adi danab ele madaku. <sup>11</sup> Adinu? Kayak Nug danab onig ele, nuhignu oo daye, ii epedia, laa onig iita ele amu nuhignu oo ii daye epedite, amubia ii hete. iita. Nug danab oh melemel laipupa ag kobol hepigpa epediadte.

<sup>12</sup> Danab oh ag do ii dooteb ele amu, ag oolagpanu laala ag hipunin heteb ele amu, ag am ge<sup>h</sup>a ag do ii doonna, padal mekulag. Am danab oh ag do waapa daateb ele amu, ag oolagpanu laala ag hipunin heteb ele amu, ge<sup>h</sup>a Kayak Nug ag dopa epediateb, padal mekulag. <sup>13</sup> Amu danab ag daulagpaib do am hamu bia dooteb ele amu, ag amu Kayak amegpa danab tutuku ii daateb. iita. Danab ag do dim lamidteb ele, danab amuib ge<sup>h</sup>a Kayak Nug ahilagnu, “Danab tutuku,” awa aku. <sup>14</sup> Iita adi danab ag do ii dooteb amge laala ag aka ahilag dab makpa do kobol dim lamidteb, danab amu ag do laa iita amge aka ahilag dab mak amu aku do ahilag bia daate. <sup>15</sup> Anam amunu ahilag

kobol anampa donu udat Kayak Nug ag oolagpa yom amu aaku miag atite. Amu ag oolagpanu ulum nug ele do amu aaku yom daate miagib ate. Adinu? Ulum amu nug haen laala dab mak ahilag, kobol ag heteb elepa epediatata, ag ehed heteb ipuanata amu haen laala kobol ag heteb ele amu, elelenab ipuanadte. <sup>16</sup> Amunu epediak ded ana udieb, Kayak Nug geha danab oh dilag kobol, ahilag dab mak lokumak daate ele amu Jesus Kristus nuhigpa, da Nai Ena mehuqtem bia, epediadku.

#### *JUDA AMU KAYAK DONU NAI ELE*

<sup>17</sup> Amge ag aka ahilagnu amu atemu? Ag, “Ig Juda danab,” anana, ag do tutukunab dim lamidna, enaib daaglagnu dab mena, ag aka Kayak binag menana, “Ig amu Kayaknu danab,” anana, <sup>18</sup> ag Kayak oo daate amu ag doonna, ag do oh doopig amunu ag ib ena amu aakuib dim lamidkulagnu amu, ag amunu ele ena doona, <sup>19</sup> ag danab amelag gaduak ib ipuanadkulagnu, ag aka ahilagnu ag elele doona, ag danab gatatupa daateb dilag amahlak danab daateb dab mena amu <sup>20</sup> ag, “Do nug ig doyak amu nai genabnu ele diig ipunigte,” dab meteb amunu ag danab laa doyak iita ele dilagpa ipunitak hekulagnu elele doona, ag nid naunau ipunitak mataglagnu ele elele daateb dooteb <sup>21</sup> amunu ag adinu danab laa dilagpa ipunitak heteb amge ag aka ahilagpa ipunitak ii heteb? Amu ag danab laa keeke yab ii aomanu ipunitak heteb amunu adinu ag aka amu ag anamnab heteb? <sup>22</sup> Ag danab ag gapai kobol ii hemananu ateb amunu adinu ag aka gapai kobol heteb? Amu ag kayak ham bupuaknu oolag ii daate amunu adinu ag aka iita adi dilag kayak ham bupuak binag mak lakanu keeke yab aoteb? <sup>23</sup> Amu ag aka binalag

human ateb. “Ig Kayaknu do dootem,” aon ateb amunu adinu ag aka do tipalteb? Ag kobol anampa ag Kayak onig heeg nauhte. <sup>24</sup> Kayak naipa yak daate amubia ag heteb. Nai am inam. “Ag aka ahilag diig ehed, amupa iita adi danab ag Kayak onig dapidna, aon aon qedateb.”

<sup>25</sup> Genab, ag do tutuku dim lamidteb dayeb amu gada otadak kobol amu keeke ena amge ag do tipalteb ele dayeb amu, gada otadak amu keeke hamu, ag danab gada ii otadpig bia aaku daateb. <sup>26</sup> Amu danab ag gadalag ii otadpig ele, ag do kobol tutuku dim lamidteb dayeb, danab amu ag onilag danab gadalag otadpig ele bia aon daateb. <sup>27</sup> Amu danab laa nug gada ii otadom amge nug do tutuku dim lamidte dayeb amu, ag Juda ag do nai yak ate bia gadalag otadpig amge ag do tipalteb dayeb amu, danab laa amu nug geha, “Ag ehed heteb,” nai amupa ag yaaladku. <sup>28</sup> Amu danab laa nug bedupaib Juda daate, nug amu Juda danab genab iita. Amu gada otadak kobol amu bedupanuib kobol iita. <sup>29</sup> Iita. Danab nug Juda danabnab amu Nug Jesusnu oopa genab doye, Kayak Oudi Nug danab amu oo babaitom. Amuam gada otadak genab aaku. Oo babaitak amuam do yak niite amu dim lamitaknu keeke iita, Oudinu keeke. Danab amu nug danab amelagpa nug binag iita amge Kayak amegpa nug binag ele.

### 3

<sup>1</sup> Anam daate amunu ag Juda danab ag Juda daanna, ena dooglagnu ib laa elete? Ag gada otadak aona, keeke ena laa anidkulagnu elelete? <sup>2</sup> Yo, ag Juda daanna, gada otadak aona, ehaniitak diigdiig anidpig. Keeke anuqaknab amu inam, Kayak Nug nai nuhignab Juda ag atog nona dim lamidkulagnu matom. <sup>3</sup> Genab Juda danab laala ag nai



amu ii dim lamidpig amge a<sub>t</sub>emun? Kobol nau ahilag amu heeb, Kayak Nug nai genab nuhig amu uukute? <sup>4</sup> Ii<sub>t</sub>anab! Danab oh ag ham bupulob amge Kayak Nug nai ham bupuak ii ma<sub>t</sub>ima. Ii<sub>t</sub>a, Nug genabib ma<sub>d</sub>i<sub>t</sub>e. Amu Kayak naipa nai laa Kayaknu daa<sub>t</sub>e amubia. Nai amuam inam. “Danab oh ag nai nuhig dooglag amu genabib dooglag. Amu laa ag Nug he<sub>t</sub>odiakpa mepeg, he<sub>t</sub>odiak amu Nug e<sub>d</sub>id<sub>k</sub>u.” <sup>5</sup> Amge kobol nau ihinig nug heeb, Kayaknu kobol ena miag atieb amu a<sub>t</sub>emu? Ig a<sub>d</sub>i a<sub>k</sub>unig? (Da danab ihinig dab mak amu dim lamite ma<sub>d</sub>i<sub>t</sub>em.) Ig, “Kayak Nug ihinig ehed haknu nob nau megte amunu kobol nuhig amuam nau he<sub>t</sub>e.” aot a<sub>k</sub>unigte? <sup>6</sup> Ii<sub>t</sub>anab! Kayak Nug danab dilag hipuninnu nob nau ii ma<sub>t</sub>alo amu Nug a<sub>t</sub>emnab danab oh dilag kobol epediadlo? <sup>7</sup> Danab laa nug inam a<sub>k</sub>utai. “Amu ham bupuak dahilpa Kayaknu nai genab daa<sub>t</sub>e miag atite dayeb, Kayak Nug amupa onig na<sub>d</sub>inab aote ele dayeb amu, a<sub>d</sub>inunab Nug da epedi<sub>l</sub>na, dahilnu, ‘Hipunin danab,’ anana, ehed hak dahilnu nob nau me<sub>d</sub>aku? <sup>8</sup> A<sub>d</sub>inu ig kobol ena be<sub>k</sub>unu amu ig kobol nau ii he<sub>k</sub>unig?” Laa nug anam a<sub>k</sub>utai amge anam i<sub>i</sub>tanab. Am elele i<sub>i</sub>tanab amge danab laala ag nai nau amu yab<sub>d</sub>u menan, “Paulusnu nai ele anamib,” aon a<sub>t</sub>eb. Amu dimpa geha Kayak Nug danab amu nob nau tutuku ehed hak ahilag<sub>n</sub>e elelepaib mada<sub>k</sub>u.

#### DANAB LAA NUG NUKA DANAB TUTUKU II BEUM

<sup>9</sup> Aria a<sub>t</sub>emnab? Ig Juda ig i<sub>i</sub>ta a<sub>d</sub>i danab e<sub>d</sub>adta, enaib daa<sub>t</sub>emte? Ii<sub>t</sub>anab! Ig matu amut, Juda, i<sub>i</sub>ta a<sub>d</sub>i ele amu hipunin nug ig oh toni<sub>k</sub>om daa<sub>t</sub>em. <sup>10</sup> Amu Kayak naipa, nai amunu daa<sub>t</sub>e am inam. “Danab laipu laa nug tutuku danab iinab daa<sub>t</sub>e. <sup>11</sup> Danab laipu laa doyak elelenab

ele iita. Amu danab laipu laa Kayak madikunu ii hete. <sup>12</sup> Danab oh ag ib apididna wana amu ag oh ehed hak danab bepig. Danab laipu laa kobol tutuku ii hete, laa iitanab iita.” <sup>13</sup> “Amu ag odelagpanu nai nau, boomaknu mod odepanu udig nau ote amubia bete, ag lemadulagpa nai ham buprak kudum maditeb.” “Amu ag mat nau, danab emalateg mauhtebe ele bia, odelagpa nai maditeb.” <sup>14</sup> “Haen oh ag nai nautud danab ug madakunu amu maditeb.” <sup>15</sup> “Amu ag danab keked matan aqaglagnu paha etak hetebe. <sup>16</sup> Ag haen oh keeke kudum heeg nauhegeg amu ug kudum danab matan, <sup>17</sup> ag danab laala ele madod daaglagnu ii dooteb” <sup>18</sup> “Ag Kayaknu enanag iinab doonna, nuhignu ag oolag ele nakok laa iinab otaita.” <sup>19</sup> Ag anam daatebe amu ig danab laipu laa nug, “Da amu danab tutuku,” akunu elele iitanab daakunu, danab wan atu ohpanu ag Kayaknu epediak waapa daaglagnu, do nai nug adi ate amu nug danab oh dilagnu ate dootem. <sup>20</sup> Do nai am danab oh dilag daate amge danab oh ag pehetak ii dim lamidtebe amunu do dim lamitak kobolpa amu danab laipu laa Kayak amegpa danab tutuku daakunu elele iitanab. Adinu? Do nai am ig hipunin ihinig uhuqa megakunu keeke iita. Do nug he, ehed hak ihinig miag atite aakuib.

#### *DANAB KRISTUSNU OOPA GENAB DOOTE AM DANAB TUTUKU*

<sup>21</sup> Amge gemu Kayak Nug he, ig Nug noobpa tutuku daagnignu ib laa, do nai amu propet dilag nai ele a ib amunu mehuqipid ele amu, ib amu miag atiom. Ib amuam ig do dim lamidta, Kayak noobpa tutuku daagnignu, ib amu iita. <sup>22</sup> Da ib laanu atem amuam inam. Danab nug Jesus Kristusnu oopa genab doote amu, Kayak nuhignu, “Danab tutuku,” awa ate. Ib amupa amu aun adi oh

ag oolagpa genab dooteb ele amu, Kayak Nug ahilag<sub>nu</sub>, “Danab tutuku,” awa a<sub>te</sub>. Danab laipu laa nug ib laapa tutuku bekunu ib laa ii daate. <sup>23</sup> Adinu? Ig danab oh ig hipunin hemut amunu ig Kayak Nug ihinignu ig a<sub>tem</sub> daagnignu dab meum amu ig amubia laa ii da<sub>tem</sub>. <sup>24</sup> Amge Kayak Nug ehanitak okai hamu megaka, ig edua awika, Nug ihinignu, “Danab tutuku,” awa a<sub>te</sub>. Ig danab, ig amu keeke laapa ii daden memut, Kayak Nug nuka Kristus Jesus nuhig udatpa amu he<sub>te</sub>. <sup>25</sup> Anuka Kayak Nug ehed haknu nob elele edua metak uua, danab dilag hipuninnu nob nau paha ii matom amunu Kayak Nug tutukuib daate, Nug amu ipunigkunu haaha, Nug he, Jesus, Nug ihinignu mauhe, tiig ne, danab oh ag nuhignu oolagpa genab dooteb ele amu, ahilag hipunin uhuqa mada<sub>kunu</sub> tituanom. <sup>26</sup> Nug ig gemu da<sub>tem</sub>, ig Kayak Nug am tutukuib daate doognignu amu Nug anam heum. Nug ig anam doognignu amu Nug danab oh ag Jesusnu oolagpa genab dooteb ele amu, Nug ahilag<sub>nu</sub>, “Danab tutuku,” awa a<sub>te</sub> ele ipunigkunu Nug anam heum.

<sup>27</sup> Anam daate amunu ig ika oninig humagnignu amu ib adeku daate? Iita. Ib amu matu kel doum daate. Amu adi keeke nug ib amu kel doum? Amu do dim lamitak kobolte? Iitanab! Oopa genab doyak, kobol amu ib amu aaku kel doum daate. <sup>28</sup> Aria ig inam a<sub>tem</sub>. “Danab nug oopa genabib doote ele amu, Kayak Nug nuhignu, ‘Danab tutuku,’ awa aku,” aot a<sub>tem</sub>. “Amu danab nug do dim lamidte, Kayak Nug nuhignu, ‘Danab tutuku’ ii ama,” aot a<sub>tem</sub>. <sup>29</sup> Amu a<sub>temu</sub>? Kayak Nug am Juda dilagib Kayakte? Iita. Nug am iita adi dilag Kayak ele daate. <sup>30</sup> Adinu? Kayak laipuib daate. Nug danab gada otadak ele amu nuhig oopa genab doyak, diig amunu,

danab amunu, “Danab tutuku,” awa aku. Amu danab nug gada ii otadak ele amu Nug danab amu ele, nuhig oopa genab doyak, diig amunu, danab amunu, “Danab tutuku,” awa aku. <sup>31</sup> Amunu ig oopa genab doyak amupatai do qeut neumte? Iitanab! Ig do aku qapamut date.

## 4

### ABRAHAMNU OOPA GENAB DOYOMNU NAI

<sup>1</sup> Aria, Abraham nug am danab ig bia, nug amu ig mamenig amunu ig nuhignu adi akunig? Nug adi doyom?

<sup>2</sup> Abraham nug do dim lamitom amupa nug danab tutuku beum dayeb amu nug nuka onig humaknu elele daku amge amupa nug Kayak onig ii humama. <sup>3</sup> Kayak nai amunu adi ate? Inam ate. Abraham nug Kayak nai aum amunu oopa genab doyom amunu Kayak Nug oopa genab doyak amu anta, “Nug am danab tutuku,” aum.

<sup>4</sup> Ig dootem, danab nug udat ha, daden nob aote, nob amunu ig do hamu metak ii atem. Iita. Keeke amuam ig udat haknu nob aku aote atem. <sup>5</sup> Amge danab nug udat hekunu ibpa danab tutuku bekunu ii dab mete, iita, nug Kayaknu oopa genab doote, Kayak, Nug he ehedhak danab ag danab tutuku daateb amu, Nug danab amu nuhig oopa genab doyak anta, “Nug am danab tutuku,” awa ate.

<sup>6</sup> Dawit ele, nug danab Kayak danab amunu udat ii dab mete amge Nug danab amunu, “Danab tutuku,” ate, danab amu nug ititak ena awom daate amunu anana, nug ele danab nug oopa genab doyak, ib amupa danab tutuku daakunu aum. <sup>7</sup> Nug inam aum. “Danab oh Kayak Nug ehedhak ahilag uhuqa matom, Nug hipunin ahilag tiigpa tonom ele amu, ag amu ititak ena aopig daateb. <sup>8</sup> Nadi

Nug danab laa, nuhig hipunin uhuqa meteb, danab amu nug ititak ena awom daate.”

<sup>9</sup> Amu danab gadalag otadak ele amu agib ititak amu aoglagte? Iita, danab gadalag ii otadak ele ag ele ititak amu aoglag, ig matu amut amubia. Nai amuam inam. “Kayak Nug Abrahamnu oopa genab doyak antom amunu, ‘Nug am danab tutuku,’ ” aum. <sup>10</sup> Amu Abraham nug atemnab dayeye Kayak nuhignu, “Danab tutuku,” aum. Amu nug gada otadom dimpatai o iita gada ii otadompatai? Nug gada ii otadom dayeye, Kayak nuhignu, “Danab tutuku,” aum. <sup>11</sup> Nug gada ii otadom, haen amupa nug oopa genab doye, Kayak Nug nuhignu, “Danab tutuku,” awa anana amu Nug amunu eponak keeke daakunu amu Kayak nug gada otadkunu aum amunu Abraham nug am danab oh, ag gadalag ii otadpig daanna, Kayaknu oolagpa genab dooteb, Kayak ahilagnu, “Danab tutuku,” ate ele amu, nug ag mamelag anuqak daate. <sup>12</sup> Amu ele, nug am danab gadalag otadak ele amu ele ag mamelag daate. Amu gada otadaknuib iita. Iita. Ag gadalag otadna, ag Abraham baeg dim lamidna, ag oolagpa genab dooteb amunu Abraham nug anuka gada ii otadom dayaya heum bia heteb.

**KAYAK NAI QAQOM, AMUAM OOPA GENAB DOYAKNU NAI**

<sup>13</sup> Anuka Kayak Nug Abraham amu nug budupud ele Nug ag geha wan atu oh madakunu nai qaka aum. Nug nai nuhig amu qaka aum amge Abraham nug do dim lamitom amunu Kayak anam ii aum. Iita. Abraham nug oopa genab doye, Kayak nuhignu, “Danab tutuku,” awa anana, Nug nai nuhig amu qaka aum. <sup>14</sup> Amunu danab ag do dim lamidteb ele, agib keeke amu oh aoglagnu

daalob amu oopa genab doyak kobol am hamu daalo amu Kayak Nug nai qaka aum ele, nai amuam bodo etak daalo. <sup>15</sup> Dopa keeke ena amu bekunu elele iita. Adinu? Do nug hipuninnu bu aqak, Kayak epegpanu udite amu, nug amu he bete amge do iita dayeb amu danab ag do tipalkulagnu am elele iita.

<sup>16</sup> Amu Kayak Nug nai qaka, ig edua awigkunu aum amge ig amu hamu mauhnoak aognignu ii aum. Iita. Ig nuhignu oonigpa genab doota, ig aognignu aum. Ig do dim lamidta aognignu ii aum. Ig ib amupa aognignu diig amu, ig Kayak Nug ehanitak okai hamu megte, kobol nuhig amupaib ig aognignu babaitom. Aria, ib amupa awaknu dayeb amu ig Abraham budub oh, laa ag Juda danab, laa ag nug oopa genab doynom amubia ag oolagpa genab doona, nug budub daateb ele amu, ig oh ib amupa Kayaknu keeke ena genabnab aognignu doognig. Adinu? Ib amuam danab oh tonadkunu elele daate. Anam daate amunu Abraham nug am ig oh ig mamenig daate, <sup>17</sup> Kayak naipa, nai inam daate bia. “Da na danab idu idu ohnu mamelag meidtem.” Abraham, nug Kayaknu oopa genab doynom amu, Kayak nuhignu, nug ig oh ig mamenig daate dab mete. Kayak Nugib danab mauhpig ele bauklel madate amu Nug keeke ii bepig ele, keeke bepig bia onilagpa ete.

<sup>18</sup> Amu Kayak Nug Abraham nugnab beka laa menukunu a amu Abraham amu doya, nug oopa genab doynom. Keeke amu bekunu am ib iita amge Kayak Nug Abraham beka laa medakunu a, Abraham nug oopa genab doynom amunu nug aaku danab diig ohnu, Kayak aum bia, mamelag beum. Kayak Nug inam aum. “Geha na budun

anam aaku beku,” awa aum. <sup>19</sup> Abraham nug doyom, nug mad nuhig 100 guguitak, nug bedu amu bodo etak amu Sara nug ele ah matoi amge Abraham nug amu doyaya, oopa genab doyak nuhig ii padom. Iita, nug oopa genab doyaya dayom. <sup>20</sup> A anam daapid amge Kayak Nug keeke dimpa bekunu nai qaka aum amunu Abraham nug amunu oo adit ii daye, oopa genab doyak nuhig ii pade neum. Iita. Nug gagatag oopa genab doyaya, Kayak binag meum. <sup>21</sup> Nug doyom, Kayak Nug haen matu keeke hekunu nai qaka aum amu hekunu elele. <sup>22</sup> Kayak Nug Abrahamnu oopa genab doyak amu anta doyom, diig amunu nug nuhignu “Danab tutuku,” awa aum. <sup>23</sup> Nai imu, “Kayak nuhignu amu, ‘Danab tutuku,’ awa aum,” nai amuam Abrahamnuib ii daate. <sup>24</sup> Iita. Ihinignu ele aaku ate. Ig Kayak, Nug he, Jesus, ihinig Nadi, edua hibaitom ele amu, ig nuhignu oonigpa genab dootem amu Kayak Nug ihinig oopa genab doyaknu amu ele anta, ihinignu, “Ag am danab tutuku,” ate. Amunu nai amuam ig oh, ihinignu nai. <sup>25</sup> Kayak Nug Jesus me udia, ihinig ehed hak uhuqa megakunu mauhom. Kayak Nug ihinignu, “Danab tutuku,” akunu Nug he, Jesus edua hibaitom.

## 5

### *OOPA GENAB DOYAKNU DIIG AM KRISTUS*

<sup>1</sup> Aria ig oonigpa genab doout, Kayak Nug ihinignu, “Danab tutuku,” awa aum amunu ihinig Nadi Jesus Kristus nuhigpa amu ig Kayak ele madod daatem. <sup>2</sup> Ig oonigpa genab doout, Nadi Jesus, nuhig udat okaipa, ig Kayaknu ehanitak okai hamu megte ele amu aot, gagatag daatem. Amu ig Nug ele hab atan enanagnab daagnignu ameg meta, ig oonig gamag ahafe. <sup>3</sup> Ig amunuib oonig gamag

ii ahate. Iita. Ug laa bedunigpa udite amupa ele ig oonig gamag ahate. Adinu? Ig dootem, ig ug dooput, ug amu ag ig oonig gagatag qedapeg, ig danab ug diigdiig maot oignignu elele bekunig. <sup>4</sup> Amu ig anam beta hebuput ukeb amu ig danab nug ug mawak haenpa nug gagatagib dayaya maote amubia bekunig. Aria ig amubia ele beta hebuput ukeb amu ig oonig madod ele daata, keeke ena anidkunignu ameg meta daagnignu, amu ele elele bekunig. <sup>5</sup> Ig anam hetata, ig gogpa ii tematanu badak laa ii dootem. Adinu? Kayak Nug nuhig Oudi ig meka, nuhigpa amu Kayak Nug nuhig oo mauhak ig oonigpa me am bete.

<sup>6</sup> Anteg! Anuka ig gagatag iita daamut, haen amupaib Kristus Nug ig danab, ig Kayak di metamut ele amu, ig edua awigkunu mauhom. <sup>7</sup> Amu danab laipu laa nug danab tutuku ehanita, nuhignu mauhku amu iita bia amge ded laipu laipu danab laa nug oo gagatag qeta, danab ena laa ehanita, nuhignu mauhkutai <sup>8</sup> amge ig am hipunin danab daautut, Kristus Nug ihinignu mauhom, amupa Kayak Nug ihinignu oo mauhte amu Nug ig ipunigte.

<sup>9</sup> Kristus ig ounig mauha, Nug tiig gokadom amunu ig ib amupa danab tutuku bemut daatem. Aria ig nau daautut, Kristus ehanikom dayeb amu, gemu Nug ig opodi bak, Kayak Nug danab dilag hipuninnu doote ele, Nug amupanu genabnab genab iite edua awigku? Yo, Nug edua awigku. <sup>10</sup> Adinu? Anuka ig Kayaknu keked daautut, Nug Beka ihinignu mauha amu mauhak nuhig amupa Nug keked kobol he, iita me, gemu ig Kayak ele oonig laipu daatem. Amunu Nug Beka bau daate, diig amunu Nug genabnab genab geha opodi bak, Kayak Nug danab dilag



hipuninnu doote ele amu, Nug opodi bak amupanu edua awigku dootem <sup>11</sup> Amuib iita, ihinig Nadi Jesus Kristus Nug he, ig Kayak ele tamanimut amunu udat nuhig amupa gemu ig Kayaknu oonig gamag ahaate.

*ADAM JESUS ELE DILAH NAI*

<sup>12</sup> Amu ig dootem, danab laipu laa hipunin heum amupa hipunin kobol oh wanpa daate. Hipuninnu nob am mauhak amunu mauhak nug danab oh dilagpa udiom daate. Adinu? Danab oh ag hipunin aaku hepig daateb. <sup>13</sup> Do nug ii beebe, hipunin nug tatam wanpa dayom amge do iita dayom amunu hipunin hedapignu do laa ii dayom, ag nob nau madaḱunu iita. <sup>14</sup> Anam dayom amge mauhak am Adamnu haenpanu daye uke, Mosesnu haenpa ele dayom. Mauhak am danab oh tonatom. Amu danab laala ag Adam do tape neum bia ii hepig amge mauhak nug danab amu ele tonatom. Adam nug he, danab oh ag mauhak waapa daateb, amubia laa uḱikunu dayom ele amu Nug uḱia he, danab ah ag bauklel waapa daaglagnu elele daateb.

<sup>15</sup> Amge Jesus Kristusnu udatpa Kayak Nug danab dilagnu, “Danab tutuku,” aate amuam Adam nug hipunin ha, na qeum bia iita. Am inam. Ig Adam nug hipunin he, danab kuḱum ag mauhak waapa daateb amunu genabnab dootem dayeb amu ig Kayak Nug Jesus Kristusnu udatpa danab kuḱum ehaniḱak okai hamu madaḱa, ahilagnu, “Danab tutuku,” aate amunu genabnab genab doognig. <sup>16</sup> Baula ele amu Kayak Nug Jesusnu udatpa danab dilagnu, “Danab tutuku,” aate, amunu gog tak amu Adamnu hipunin nobnu gog tak eḱidte. Adinu? Hipunin laipuib hak dimpa amu danab oh ag epeḱiak aon mauhaknu

nai waapa daateb amge Kayak Nug danab dilag hipunin hak kuḍum dimpa Nug Jesus Kristusnu udatpa ahilagnu, “Danab tutuku,” a, ag danab tutuku beteb. <sup>17</sup> Amunu genab, ig danab laipunu hipuninpa mauhak aaku naḍi ma dayaya, danab oh tapalate noteb dooṭem amge ig genabnab genab Kayak Nug ehanitak okai hamu megte amupa aun aḍi ag Kayaknu ehanitak okai hamu megte amu nuhig tutuku oiyak ele aona, ag bauklel daateb dooṭem.

<sup>18</sup> Amunu danab laipu nug do tipalom, hipunin amupa danab oh padal mepig, amubia danab laipu laa Nug kobol tutuku he, Kayak Nug kobol amunu dab ma, ig danab ihinig ohnu, “Tutuku danab,” aum. <sup>19</sup> Danab laipu nug nai tape neum, kobol nuhig amupa danab oh hipunin danab daateb. Amubia danab laipu laa Nug nai dim lamiṭom, kobol nuhig ena amupa danab oh geha danab tutuku beḱulag. <sup>20</sup> Aria Kayak Nug danab do mate, danab ag hipunin tuḍidna, kuḍum hepig amge hipunin okai meeme, Kayaknu ehanitak okai hamu megte amu okainab meum <sup>21</sup> amunu hipunin nug he, danab oh mauhteḱeb amubia Kayaknu ehanitak okai hamu megte amuam he, ihinig Naḍi Jesus Kristus, nuhigpa danab ag danab tutuku bena, bauklel aoteb.

## 6

### *HIPUNIN NUG KRISTEN AIB TONOM*

<sup>1</sup> Amunu ig aḍi nai akunig? “Ig hipunin kuḍum hetata daaput, Kayak Nug ehanitak okai hamu mekad!” akunigte? <sup>2</sup> Iitanab. Aḍinu? Ig am danab mauhom, kobol nau, kobol ena laa ele ii heṭe, amubia ig kobol nau matu uumut. Amu ig aṭem heta, gemu ig kobol

uumut ele amu edut baula hetat oignig? <sup>3</sup> Ag imu am iite dooteb? Ig Kristus Jesus ele tamanit, layatak aomut amu, kobol amupa ig ele mauhak nuhigpa laipu mauhmut bia daamut. <sup>4</sup> Amunu ig layatak aomut, amupa ig aaku Kristusnu mauhak amu ig ele laipu mauhut, Kayak Nug ig Kristus ele laipu boomikom daamut. Ig anam daamutnu diig am Mama Nug nuhig gagatag okai amupa he, Kristus edua hibaitom amubia Nug heeb, ig ele oiyak bau aot oignignu elele daagnig.

<sup>5</sup> Ig genab Nug ele laipu tamanit, Nug ele oh mauhta daamut dayeb amu genabnab ig Nug ele laipu tamanit, Nug edua hibaitom bia, ig ele edut hipaidkunig. <sup>6</sup> Amu ig dootem, hipuninnu gagatag ig bedunigpa udat hete ele, amu qeeb, iita mekunu, ig hipuninnu begbeg baula daamtanu amu ig oonig edue, layatak aot amu ihinig oo alag nug aaku mauhom, Jesus Nug ad emaitakpa mauhom bia. <sup>7</sup> Ig hipuninnu begbeg ii daamtanu diig am danab nug mauhte amu nug baula hipuninnu gagatag waapa ii daate.

<sup>8</sup> Amu ig Kristus ele mauhmut dayeb amu ig geha Nug ele bauklel daagnignu amu ig oonigpa genab dootem. <sup>9</sup> Am ig dootem, Kristus Nug edua hibaitom amunu Nug baula ii mauhma. Mauhak nug Kristus adeb, Nug mauhak waapa daakunu elele iita. <sup>10</sup> Jesus Nug haen laipuib ihinig hipunin uhuqa megakunu mauhom. Nug baula ii mauhma amge gemu Nug bau daate amu Nug Kayak oo niite amu dim lamidkunu bau dayaya dab mete.

<sup>11</sup> Amubia ag aka aka ag hipuninnu gagatag waapa ii daateb amge ag Kristus Jesus, ihinig Nadi, nuhigpa ag Kayak oo niite amuib dim lamidkulagnu daateb, ag amu oh dab menan oiyeg! <sup>12</sup> Ag anam oina, ag hipunin

waapa, nug ag eedateb, ag bedulag<sub>nu</sub> dab mak nau dim lamidk<sub>u</sub>lag<sub>nu</sub> aib hepig. <sup>13</sup> Ag epelag, baelag amu bedulag oh ag hip<sub>u</sub>nin hek<sub>u</sub>lag<sub>nu</sub> Satan aib medapig. Iita. Ag aka ag danab mauhpig edun hipaidp<sub>ig</sub> bia amu ag bedulag oh kobol tutuk<sub>u</sub> hek<sub>u</sub>lag<sub>nu</sub> Kayak meteg! <sup>14</sup> Hip<sub>u</sub>nin am ahilag okai baula aib dayom. Adinu? Gemu ag do waapa ii daateb. Ag am Kayaknu ehanitak okai hamu megte amu waapa daateb.

*KRISTEN NUG KOBOL TUTUKU WAAPA DAAKU*

<sup>15</sup> Amunu ig atem hek<sub>u</sub>ni<sub>g</sub>? Ig do waapa baula ii daatem, ig Kayaknu ehanitak okai hamu megte waapa daatem amunu ig hip<sub>u</sub>nin hek<sub>u</sub>ni<sub>g</sub> am enate? Iitanab iita! <sup>16</sup> Am ag imu iite dooteb? Ag bedulag danab laa metona, nuhig nai dim lamidna amu ag aaku nuhig begbeg daateb. Am ag ehed hak kobolnu begbeg daateb dayeb amu ag mauhak amupa aoglag, o iita ag Kayak ode dim lamidteb dayeb am ag danab tutuk<sub>u</sub> daaglag. <sup>17</sup> Ib adit amu oh daatep amge ig ahilag<sub>nu</sub> Kayak amegpa, “Ena heme,” aot atem. Adinu? Anuka ag hip<sub>u</sub>ni<sub>nnu</sub> begbeg daapig amge dimpa Kayak Nug ag nuhig nai waapa maate, ag Nug ode dim lamidna autna aoteb. <sup>18</sup> Amu Kayak Nug ag ehed hak kobol oopan<sub>u</sub> uhuqate, ag aaku tutuk<sub>u</sub> kobolnu begbeg bepig daateb.

<sup>19</sup> Amu dab mak ahilag gagatagnab ii qeum amunu da danab ihinig kobol laapa imu ipuanadk<sub>u</sub>lnu heinne atem. Anuka ag bedulag laih oh dubutid kobol amu do tape naknu kobol elenu begbeg ma<sub>on</sub> amu ag do tape nak kudum baubau ele tudidna hek<sub>u</sub>lag<sub>nu</sub> hepig amubia ag gemu ag bedulag laih oh kobol tutuk<sub>u</sub>nu begbeg maadna

amu ag opia awak danab beig! <sup>20</sup> Anuka ag hipuninnu begbeg daapig amu haen amupa ag kobol tutukunu begbeg iinab daapig. <sup>21</sup> Amu ag kobol nau hepig, ag gemu kobol amunu udalag nete ele amu, kobol amupanu ag adi keeke ena aopig? Kobol amuam mauhakib he bete. <sup>22</sup> Amge Kayak Nug ag hipuninnu kobolpanu uhuqata, Nug ag nuhig begbeg maatom amunu ag nuhig keeke ena aonna, opia awak danab beteb. Ag anam betebnu gogtak amu ag bauklel hanhannu aoglag. <sup>23</sup> Hipuninnu nob am mauhak amge Kayak Nug ig bauklel, Jesus Kristus, ihinig Nadi, nuhigpa hamu mekom.

## 7

**KOBOL BAUPA OIYAK**

<sup>1</sup> O lailad, ag do nai dooteb amunu ag do nug danab bau daate, haen amupa aakuib nug danab amu tonate ele dooteb. <sup>2</sup> Ag amu anidkunignu amu da nai imu madipi dooglag. Ah laa nug danab awom amu gamu nug bau daate haenpa, ah nug aaku do ate bia, nug gamu eleib ewau daaglahnu daate. Amge gamu mauheb amu do amu ah amu geha ii toneb, nug aaku do amu waapa ii daama. <sup>3</sup> Amu gamu nug bau dayeb, wau nug uuita, danab laa aweb amu ag ah amunu amu, "Gapai ah," aon akulag. Amge gamu mauhom dayeb, do amu nug baula ii tonate amunu nug danab baula aweb amu nug aaku gapai ah ii daama.

<sup>4</sup> Amunu o lailad, gemu ag laa, Nug mauhowa, edua hibaitom ele amu, nuhig daaglagnu, ag ig ele oh ig Kayaknu kobol ena hekunignu, ag Kristusnu mauhakpa, danab laa mauha do waapa ii daate, amubia ag do waapa

ii daateb. <sup>5</sup> Amu ig hipunin kobolpa daamut, haen amu do nug bedunignu dab mak nau mad ete ahe, hipunin hemut. Kobol amu bedunig laih naunau ohpa heehe amupa mauhak aaku beum. <sup>6</sup> Amge gemu ig danab laa nug mauha, do waapa baula ii daate, amubia ig do, nug ig tonike daamut ele amu, nug waapa ii daatem. Gemu ig do yaapig ele, amu waapa daata, amuib dim lamidkunignu udat ii hetem. Iita, ig am kobol bau, Kayak Oudi ihinigpa mad ete ahom ele amu, ig amu hetem.

#### *HIPUNIN AMU DO ELE DILAH NAI*

<sup>7</sup> Amunu ig adi akunig? Ig, “Do amu hipunin ele a am keeke laipu,” akunigte? Iitanab! Amge genab, do nug da hipunin ii ipunidlo amu da adi kobol am hipunin ele amu, da ii doolom. Amu inam bia. Do ate, “Na aib danab laanu keeke amen qeum.” Do anam ii alo amu da ameg qak kobol am nau amu, da ii doolom. <sup>8</sup> Amge hipunin nug do amupa ameg qak kobol oh da oolpanu he beum. Amu do ii daate dayeb amu hipunin am bodo etak daate. <sup>9</sup> Anuka dahilpa do ii dayeye, haen amupa da bau daami. Amge dimpa Kayaknu do dahilpa udie, hipunin dahilpa ele udie, da mauhmi. <sup>10</sup> Kayak Nug tatam da bauklel aokulnu do medom amge da dopa bauklel ii aomi, do nug da iwe mauhmi. <sup>11</sup> Adinu? Do udiom amupa hipunin nug ib ele dayaya, nug da hipunin hekulnu da bupuida, do he, da aaku hipunin hei amu Kayak Nug dahilnu, “Na mauhkut,” aum. <sup>12</sup> Amunu ig dootem, do nuka am enanag, opia awak ele. Amu donu nai oh ele am enanag, opia awak amu tutuku ele.

<sup>13</sup> Aria, gemu amu a<sub>temu</sub>? Keeke ena amute da iwe mauhmi? Ii<sub>tanab</sub>! Hip<sub>unin</sub> da iwe mauhmi. Amupa amu hip<sub>unin</sub> miag atie, nug keeke naunab daa<sub>te</sub>, ig doo<sub>tem</sub>. Hip<sub>unin</sub> nug keeke ena amu awa, u<sub>dat</sub> amupa haaha, oi<sub>de</sub> mauhmi amunu hip<sub>unin</sub>nu diig miag at<sub>ite</sub>, nug am keeke naunab. <sup>14</sup> Ig doo<sub>tem</sub>, Kayak O<sub>udi</sub> Nug d<sub>opa</sub> amu Kayaknu dab mak ip<sub>unig</sub><sub>te</sub> amge da ool alag ele amunu da Kayaknu dab mak ii dim lamid<sub>tem</sub>. Hip<sub>unin</sub> da hipalid<sub>om</sub> amunu da nuhig begbeg daa<sub>tem</sub>. <sup>15</sup> Amu kobol da he<sub>tem</sub> ele, diig amuam da ii doo<sub>tem</sub>. Kobol da amunu ool he<sub>te</sub> ele amu da ii he<sub>tem</sub>. Amge kobol da amunu oolpa nau, ninig ele doo<sub>tem</sub> amu, da amu he<sub>tem</sub>. <sup>16</sup> Aria da kobol oh, da he<sub>kul</sub>nu ool iinab he<sub>te</sub> ele amu, da kobol amu he<sub>tem</sub> dayeb amu da dahil kobol amupa amu da, “Do am ena,” awe a<sub>tem</sub>. <sup>17</sup> Amunu da gemu doo<sub>tem</sub>, da da<sub>ka</sub> kobol amu ii he<sub>tem</sub>. Ii<sub>ta</sub>! Hip<sub>unin</sub> da oolpa ni<sub>ite</sub> ele amu, nug kobol anam he<sub>te</sub>. <sup>18</sup> Amu da doo<sub>tem</sub>, da oolpa am keeke ena laa iinab daa<sub>te</sub>. Amuam da ool alagnu a<sub>tem</sub>. Amu genab, da kobol ena he<sub>kul</sub>nu ool he<sub>te</sub> amge da he<sub>kul</sub>nu elele i<sub>ita</sub>. <sup>19</sup> Amu kobol ena da he<sub>kul</sub>nu ool he<sub>te</sub> amu da ii he<sub>tem</sub>. Kobol nau, da he<sub>kul</sub>nu ool iinab he<sub>te</sub> ele amu, da amu aaku he<sub>tem</sub>. <sup>20</sup> Amunu da kobol da ool iinab he<sub>te</sub> ele, da amu he<sub>tem</sub> dayeb amu da da<sub>ka</sub> kobol amu ii he<sub>tem</sub>. Ii<sub>ta</sub>! Hip<sub>unin</sub>, da oolpa ni<sub>ite</sub> ele amu, nug aaku he<sub>te</sub>.

<sup>21</sup> Anam amunu kobol inam da oolpa daa<sub>te</sub> amu anidmi. Da kobol ena he<sub>kul</sub>nu ool he<sub>te</sub> amge kobol nau nug dahil ib kel do<sub>te</sub>. <sup>22</sup> A<sub>dinu</sub>? Da dahil dab mak unuqagpa amu da Kayaknu d<sub>onu</sub> enanag doo<sub>tem</sub> <sup>23</sup> amge da d<sub>o</sub> laa ele dahilpa daa<sub>te</sub> anid<sub>tem</sub>. D<sub>o</sub> laa, amuam Kayaknu d<sub>o</sub>, dab mak dahilpa daa<sub>te</sub> amu d<sub>o</sub> laa, amuam hip<sub>unin</sub>nu d<sub>o</sub>, dahilpa u<sub>dat</sub> haaha daa<sub>te</sub> ele amu, d<sub>o</sub> a<sub>dit</sub> amu a dahilpa

daatep. A daaiya, ban heyaya, nau nug da hipalide, da danab nug mani guitakpa dayaya, nuhig dab mak dim lamidkunu elele iita, amubia da kobol ena dim lamidkulnu am elele iita. <sup>24-25</sup> Gadonnab! Da qagaitaknab daatem! Da daka dab mak dahilpa Kayaknu do waapa daatem amge ool alagpa amu da hipuninnu do waapa daatem. Aun nug da ehanideb, da baula hipuninnu do, nug he da mauhem ele amu, da nug waapa ii daapa? Amu da Kayak amegpa, “Ena heme,” awe aatem. Adinu? Jesus Kristus, ihinig Nadi, nuhigpa da uhuqak ena aomi daatem.

## 8

### OIYAK LAA KAYAK OUDI NUG GUMATE

<sup>1</sup> Amunu ig danab ah ig Kristus Jesus ele tamanimut daatem ele amu, ig hipuninnu nob nau aognignu ii daatem. <sup>2</sup> Adinu? Da Kristus Jesus ele tamanida laipu daatem amunu Kayak Oudinu do, ig oh bauklel megte ele amu, Nug da hipuninnu do amu mauhak elepanu edua awide amu gemu da baula amu ele ii tamanitem. <sup>3</sup> Amu inam. Ig oonig alag nug donu gagatag lopadom amunu do nug heeb, ig ena bekunignu elele iitanab amge keeke do nug hekunu elele iita amu, keeke amu Kayak nuqa heum. Kayak Nug nuqa Nug Beqa me udia, danab beum. Nug bedu am, ig hipunin danab ig bedunig bia tagitom amge Nug am hipunin laa iita. Nug ihinig hipunin uhuqa megakunu udie, Kayak Nug ig danab, ihinig hipuninnu nob Jesus nuhigpa me, ig baula hipuninnu gagatag waapa ii daatem. <sup>4</sup> Nug anam heeb, do nug tutuku oiyak kobol ipunigte amu ig laa, ig oonig alagnu kobolpa ii oitem, ig



Kayak Oudinu kobolpa oitem ele amu, oiyak amu ihinigpa beḱunu heum.

<sup>5</sup> Danab ag beḱu kobolpa oiteb, ag keeke alagnuib dab mak aoteb amge danab ag Kayak Oudinu kobolpa oiteb, ag am Kayak Oudinu kobol amunuib dab mak aoteb. <sup>6</sup> Danab nug oo alagnu keekenuib dab maama oiku, danab amu nug mauhku. Danab nug Kayak Oudinu keekenuib dab maama oiku, danab amu nug bauklel awa, maḱoḱ daaku. <sup>7</sup> Anam daatenu diig amu danab nug oo alagnu keeke dab mete amu nug aaku Kayaknu kekeḱ daate. Aḱinu? Nug Kayaknu ḱo waapa ii daate amu nug anam heḱunu amu elele iita <sup>8</sup> amunu danab ag oolag alagpa oiteb ele, danab amu ag Kayak oo daate ele, kobol amu ag heḱulagnu elele iita.

<sup>9</sup> Amge ag Rom danab, ahilagnu amu Kayak Oudi Nug ahilagpa daate dayeb amu ag oo alagnu kobolpa ii daateb. iita. Ag am Kayak Oudinu kobolpa daateb. Amu danab laa nug oopa Kristusnu Oudi iita, nug am Kristusnu danab iita. <sup>10</sup> Ag hipunin hepig amunu ag bedulag mauhte amge Kristus ag oolagpa daate dayeb amu ag ouḱilag bauklel daate. Aḱinu? Kayak Nug ahilagnu, “Danab tutuku,” aum. <sup>11</sup> Kayak Nug he, Jesus eḱua hibaitom ele amu, Nug nuhig Oudi ag oolagpa daate dayeb amu, Kayak he, Jesus eḱua hibaitom ele, Nug geha ag bedulag mauhte ele amu bauklel, Oudi nuhig, ag oolagpa daate ele amu, nuhigpa ag madaḱu.

<sup>12</sup> Amunu o lailad, ig Jesus dim lamidḱunignunab dootu! Ig oonig alag aḱi heḱunignu ate, ig nug ode doot dim lamidḱunignu aib dab memut. <sup>13</sup> Aḱinu? Ag beḱunu kobol dim lamidḱulag amu ag mauhḱulag amge ag Kayak Oudinu gagaḱagpa beḱunu kobol di metan, ii dim lamidḱulag amu, ag bau daaglag.

<sup>14</sup> Danab aun adi ag Kayak Oudi Nug ib tutuku ukaknu ipuanate, ag ib amu dim lamidteb ele amu, ag am Kayak bekod. <sup>15</sup> Ag Kayak Oudi aopig amu Nug he, ag begbeg danab, ag ahilkad okai badadna oiteb, amubia ii oiteb. Iita, ag Kayak Oudi aopig amu Nug he, ag Kayak bekod daateb. Kayak Oudi Nug he, ig “Mame, Mame” aot atem. <sup>16</sup> Kayak Oudi Nug ig am Kayak bekod daatem amu, Nug amu ipunigte. <sup>17</sup> Amu ig Kayak bekod daatem dayeb amu ig geha keeke Nug megakunu dab mete ele amu aognig. Laa ele amu Kayak Nug keeke Kristus medakunu dab mete amu ig Nug ele oh amu aognig. Yo, ig Kristus ug mawom, ug amu tudidta maognig amu dimpa ig Nug hab atan dayak enanag awom ele amu, ig amu ele aognig.

#### *HAB ABPA DAYAK ENANU NAI*

<sup>18</sup> Ig gemu ug imu dootem amu dahil dab makpa keeke amuam dimpa ig keeke ena ena aognig amu ii edidte. Iita. Keeke ena amu nug ug imu huana edidte! <sup>19</sup> Amunu keeke oh Kayak hatom ele amu, keeke amu oh ig Kayak bekod, ig geha miag atiak bekunignu haen amu, ag amu ameg mena, ikilag human neegna daateb. <sup>20</sup> Gemu am keeke oh ehed daanna nauhtebe. Keeke amu ag aka ahilag dab mak dim lamidna anam ii daateb. Iita, Kayak Nug nuka nuhig doyak ena dim lamiita, hipalatom daateb. Amge ag gog taknu keeke ena, Kayak madakunu aum amu, ag amu ameg mepig daateb. <sup>21</sup> Adinu? Kayak Nug geha keeke oh gemu ag nauhaknu hipalakpa daateb ele amu, Nug ag amupanu uhuqateb, keeke amu oh ag ig Kayak bekod, ig ele oh enanag beta daagnig.

<sup>22</sup> Amu ig dootem, keeke oh Kayak hatom ele, ag daanna, ah nid menukunu guitak doyaya aeqagte, ag amubia henan daaegeg udie, gemu ele anamib henana

daateb <sup>23</sup> amge Kayak keeke ha<sub>tom</sub>, keeke amu aakuib ag anam ii dooteb. Iita. Ig Kayak Oudi aomut, Nug am hanhan ena dayak awaknu hapin pania mekom daate, ig ele Kayak Nug heeb, ig bedunig bau aot, ig Nug bekodnab daagnignu aeqakata, ameg meta daatem. <sup>24</sup> Kayak Nug ig edua awikom amu, gemu ig amu gogpa tekunu, keeke ena amu ameg metem. Amge ig gogpa taknu keeke ameg metem ele amu, ig amu anidta malalom amu gogpa taknu ameg mak laa ii daalo. Danab nug gogpa tak antom ele, nug adinu baula gog taknu ameg ma daaku? <sup>25</sup> Amge ig keeke ena amu aognignu genab dab metem dayeb amu ig madodpaib ameg meta daatem.

<sup>26</sup> Kayak Oudi Nug ele ig danab ig gaga<sub>tag</sub> iita amu ehanigte. Ig adinu unuqidkunig amu ig ii dootem, ig oonigpaib gaatem, ig miag matulta ii atem amge Kayak Oudi Nug am ig ehanika, ihinignu Kayak unuqidte. <sup>27</sup> Amu Kayak, Nug danab oo unuqagnab anidte ele, Nug nuhig Oudinu unuqitak amu doote. Adinu? Kayak Oudi Nug danab dilag unuqitak awa, Nug Kayak oo niite bia amunu unuqidte.

<sup>28</sup> Amu ig dootem, danab aun adi ag Kayaknu oolag mauhte, Kayak Nug nuhig dab mak dim lamita, Nug ag edua diikunu anana, Nug ag onilagpa eum ele amu, Kobol adi adi ahilagpa beteb amu ag beegeg, Kayak Nug danab amu guma<sub>ta</sub> atog noate, ena beteb. <sup>29</sup> Adinu? Danab Kayak Nug ag matu doya<sub>tom</sub> ele amu, ag Nug Be<sub>ka</sub> daate bia daaglagnu, ag geha be<sub>kod</sub> kudumnab daapeg amu Kristus Nug am ahilag anuqak dayebbeb daaglagnu tituanat<sub>om</sub> daateb. <sup>30</sup> Amu Nug danab anuka tituanat<sub>om</sub> ele amu, Nug ag ele onilagpa eum. Nug danab onilagpa eum ele amu, Nug ahilagnu ele, “Danab tutuku,” awa aum.

Nug danab laala, Nug ahilagnu, “Danab tutuku,” aum ele amu, Nug he, ag Nug Beka bianab beteb.

### **KAYAKNU OO MAUHAK**

<sup>31</sup> Amunu ig Kayak keeke heum ele, amu ohnu ig adi aot akunig? Ig inam aot akunig. “Kayak Nug ig ehanigte dayeb amu aun nug ig keked megaku?” aot akunig. <sup>32</sup> Nug Beka ig megakunu amu Nug amunu oo ii qe, Nug ig oh ehanigkunu me udiom. Nug anam heum amunu geha, keeke laa oh ele amu, Nug ig hamu iite megaku? Yo, Nug megaku. <sup>33</sup> Kayak nug danab ah tituanatom amu aun laa nug ag hetodiakpa maadku? Auntai, laa ita. Adinu? Ag Jesusnu oolagpa genab dooteb amunu Kayak ahilagnu, “Ag am hipunin danab ita,” aum. <sup>34</sup> Aun nug danab ah amu hipuninu nob nau aoglagnu aku? Auntai, laa ita. Adinu? Jesus Kristus Nug nuka aakuib mauhowa, Nug edua hibaita, gemu Nug hab atan apa Kayak epeg nadiappa, amuam anuqak aben, amupa dayaya, ihinignu Kayak amegpa unuqidte. <sup>35</sup> Ig Kristusnu oo mauhak oopa daatem amu aun nug amupanu matakika aoku? Ug laate, o ita keeke ig oonig ii hete ele amute, o ita guitak mekak amute, o ita enug haen amute, o ita keekenu tutu mak amute, o ita qagaitak haen amute, o ita mauhak amute nug Kristusnu oo mauhak oopanu matakika aokute? Itanab. <sup>36</sup> Ug amu oh, amuam Kayak naipa, nai laa daate bia. “Ig danab ah nahipad daatem amunu dedoh danab laala ag ig iqapeg mauhkunignu ib amu tapat gotem. Am genab, ag ihinignu, ig am keeke hamu, dod bia doonna, iqapeg mauhkunignu dab meteb” <sup>37</sup> Amge keeke amu oh ig edigkulagnu am elele ita. Ita, Kristus Nug haen oh ihinignu oo huana mauhte amunu ig kobol nau amu oh edadtem. <sup>38</sup> Amu da imu genab dootem.

Ig Kristusnu oo mauhakpa daatem amunu aditai keeke laa iinab amupanu matakigma. Yo mauhak, o iita bau dayak, o iita engel, o iita oudi nau, o iita gagatag laa, o iita gemu haen imu adi keeke bete, o iita buti keeke adi adi beku, <sup>39</sup> o iita wan qadepanu keeke, o iita wan unuqagnu keeke, amu oh oolagpanu laipu laa nug ig Kayaknu oo mauhakpa daatem imu iinab matakigma. Genab keeke oh Kayak heum daateb ele, amu oolagpa keeke laipu laa nug Kayaknu oo mauhak, Nug Kristus Jesusnu mauhakpa amu ipunikom ele amu, keeke laa oo mauhak nuhig amu oopanu iinab matakigma.

## 9

### *KAYAK NUG TATAM ISRAEL TITUANAṬOM*

<sup>1</sup> Da Kristusnu danab dayeye, nai imu genabib maditem. Da ham ii bubuṭem. Ulum metaknu dab mak Kayak megte dahil amu, Kayak Oudi Nug amu gumeme, amupa ele da ham ii bubuṭem dooṭem. <sup>2</sup> Nai amuam inam. Israel danab ag Jesus di medapig amunu da oolpa ug doyeye, haen oh ug naunab dooṭem. <sup>3</sup> Kayak Nug da lailad, ag am da ele tiinig laipu, Nug ag edua diikunu ool okai daate amunu ib laa elele daalo, Kristus da gedileb, da laih wain padal melom, ib amupa da Israel danab ah ag Kayak noobpa ena daaglagnu ehanadkulnu elele daalom amu da anam helom. Amge ib anam bia laa iita. <sup>4</sup> Ag am Kayaknu danab amu ag Nug bekod maatom daateb. Amu ag nuhig amahlak, nuhig gagatag ele anidpig daateb. Amu ag Nug ele nug tituanna, nai qagapig, nuhig do ele aona, binag metak kobol doyeg amu Nug ag ehanadkunu nai qaka maṭia maatom. <sup>5</sup> Kayaknu danab anukanu amu, ag am

Israel danab memetalkadnab. Amu Kristus ele amu, Nug danab daakunu, Nug Israel budulagpa doum. Nug am keeke oh dilag iki daate. Nug am Kayak genab, ig Nug binag hanhan metu! Genab.

<sup>6</sup> Israel ag amu oh aopig, Kayak Nug ele ag nuhikudnab daaglagnu aum amunu ig adi akunig? Ig, “Kayak nai nug gai iita meum,” akunigte? Iitanab. Adinu? Danab oh ag Israel budub bepig ele, ag oh am genab Israel danab ii daateb. <sup>7</sup> Ele amu laa oh ag Abraham tiigpan dopig ele amu, Kayak Nug ag ahilag ohnu nai ii qakom amunu danab oh ag Abraham tiigpan dopig, ag oh am nug bekodnab ii daateb. Adinu? Anuka Kayak Abraham amegpa inam aum. “Na budunnab am Isak budubpaib beku,” awa aum. <sup>8</sup> Nai amuam inam ipunigte. Aun adi ag wan imupan kobolpa Abraham budub bepig daateb ele amu, ag amunu Kayak bekod ii daateb. Iita, laa ag Kayak Nug nai nuhig qaka aum, ag amunu oolagpa genab dooteb ele amu, ag am Kayak bekod, Abraham budubnab daateb. <sup>9</sup> Kayak Nug nai nuhig qaka aum am inam. “Haen da memipa, da geha da edue udien hepi, Sara nug elele daya, nid danab nahip menuku.”

<sup>10</sup> Amuib iita. Rebeka bekod adit, a mamelah laipu Isak, ig mamenig, nugnab opanu <sup>11</sup> amge Kayak Nug danab tituanadte, Nug tituanak amu danabnu udat dab medata ii hete, Nug nuka nuhig doyak dim lamita hete ele amu, Nug amu miag atiak daakunu amu haen a anilah nid adit amu ii menuatom amunu a kobol ena, kobol ehed laa ii hepid ele, haen <sup>12</sup> amupa Kayak Rebeka amegpa aum. “Nid tatamnu am nid gehanu waapa daaku,” awa aum. <sup>13</sup> Kayak naipa yak amunu inam daate. “Da Jakopnu ool huana

mauh̄te amge Esaunu amu da ool ii hēte.” <sup>14</sup> Amunu ig ādi ak̄unig? Ig, “Kayak Nug kobol tutuku ii heum,” ak̄unigte? ītanab. <sup>15</sup> Ad̄inu? Nug Moses amegpa aum. “Da danab laanu oo gai īta dook̄ulnu ool heeb amu da anam hek̄ul. Amu da danab laanu oo doyak dook̄ulnu ool heeb amu da nuhignu anam hek̄ul,” awa aum. <sup>16</sup> Amunu keeke amuam danab laa nuhig dab makpanu keeke īta, udat ena hēte amupa ele īta. Amuam Kayak Nug oo gai īta doyak kobol nuhig, Nug amupa hēte. <sup>17</sup> Amu Kayak nug Paro amegpa ādi aum amu, nai amuam Kayak naipa inam daate. “Da dahil gagatag nahippa danab oh ipuanadk̄ulnu, ag geha da onil wan atu ohpa mehuq̄kulagnu, da na king meiti, na ok̄ai aaku daatem.” <sup>18</sup> Amunu ig doot̄em, Kayak Nug danab laipu laa nuhignu oo gai īta dook̄unu oo hēte amu Nug aaku anamib hēte, o īta Nug danab laipu laa oo ituak medak̄unu oo hēte amu Nug aaku hēte.

<sup>19</sup> Amunu laa nug da amelpa inam aku. “Anam dayeb amu ad̄inu Kayak Nug danab laa, nug bedupa nai yaate? Aun nug Kayaknu dab mak qeeb nek̄unu elele?” <sup>20</sup> Amge danab na amu ādi, na Kayaknu nai nob mekutnu elelete? Wan hinai nug danab nug hēte ele amu, nug amegpa, “Na ad̄inu inam heid̄tem?” od̄ medatete? <sup>21</sup> Danab wan hinai hēte ele amu, nug wan lekoh idu laipupa hinai ad̄it, laa bala enanagnab, udat ena haknu amu laa bala īta, udat mauhnoak haknu hatk̄unu dab maama, nuhig dab mak dim lamīta hek̄unu elele ītate?

<sup>22</sup> Amu inam bia. Danab ag ehed̄ heegeg, Kayak Nug opodi bak, Nug danab dilag hipuninnu doote ele amu, Nug opodi bak amu, nuhig gagatag ele miag atik̄unu dab mēte amge Nug anam paha ii hēte, Nug danab amu ag nob nau aoglagnu elelenab daateb amge Nug ahilagnu

amu madodpaib amelag meum daate dayeb amu Nug ehed laa hetete? Iiṭa. Kayak Nug tatam ag nob nau aoglagnu daateb antom. <sup>23</sup> O iṭa Nug nuhig amahlak, bala ele danab nuhikud, Nug danab amu dilagnu Nug oo gai iṭa doote ele amu, Nug nuhig amahlak amu bala ele heeb anidna oo daye hete dayeb amu Nug aaku ehed laa hetete? Iiṭa. Nug danab amu anuka Nug ele daaglagnu tituanatom amu <sup>24</sup> danab amuam ig danab ig Jesusnu oonigpa genab dootem. Nug ig Juda danab amu iṭa adi danab ele ig anam hekunignu oninigpa eum. <sup>25</sup> Amuam Kayak naipa, nai laa Hosia yom, nai amu daate amubianab. Nai amuam inam. “Danab dahiladnab ii daateb ele, geha da ahilagnu ele, ‘Dahilad danab,’ akul. Danab da ahilagnu ool ii mauhom ele, da ahilagnu ele geha ool mauhku. <sup>26</sup> Ahilagnu amu da, ‘Ag am danab dahilad iṭa,’ ami amu ag aben amu doopigpanab amu geha da ahilagnu, ‘Ag am Kayak bauklel bekod,’ awe akul.” Hosia nug Kayak ode anam awa yom.

<sup>27</sup> Aria Jesaia nug Israel dilagnu Kayak naipa inam yom daate. “Israel danab ag yu ihipa, abud daate bia, eb qak ahilag anam daaglagtai amge Kayak Nug geha eb qak honapib edua diiku. <sup>28</sup> Adinu? Geha Naḍi Nug epediak heeb, iṭa meeb, wanpanu danab paha nob madaḱu,” awa aum. <sup>29</sup> Haen matu laa Jesaia amunu inam aum. “Kayak Naḍi Nug budunkad laala ii uuateb daalob amu ig Sodom bia beta amu Gomora bia daalom.” Nug anam yom.

#### *ISRAEL AG OOLAGPA GENAB II DOOPIG*

<sup>30</sup> Amunu ig inam aot akunig. Iiṭa adi danab ag Kayaknu tutuku oiyak kobol aoglagnu udat ii hepig amge ag tutuku oiyak amu aopig. Kayaknu tutuku oiyak, amu awaknu ib am oopa genab doyak. <sup>31</sup> Amu Israel ag am do tutukuib dim lamidna, tutuku oiyak aoglagnu hepig amge ag do



kobol elelenab ii hepig amunu ag tutuku oiyak ii aopig. <sup>32</sup> Adinu ag ii aopig? Ag oolagpa genab doyak uupig amunu ag ii aopig. Ag am udatib henana aoglagnu dab mepig. Amu men baelag yaaladte ele amu, men amu ag baelag yaalate nena qepig. <sup>33</sup> Kayak naipa, nai amunu inam daate. “Anteg! Sion apa da men laa, danab baelkad yaaladkunu epami daate. Men amu danab baelag yaalateb, nena qekulag ele amu, da epami daate amge danab laa ag nuhignu oolagpa genab dooglag, ag geha uda nak iinab aomna,” awa ate.

## 10

### *KAYAK NUG DANAB AH OH EDUA DIIKUNU OO DAATE*

<sup>1</sup> O lailad, Kayak Nug danab dahilad, Israel, ag edua diikunu ool unuqag ele doyeye, da hanhan amunu Kayak unuqidtem. <sup>2</sup> Da Juda ahilagnu doye aute aotem amunu miag iiku atem. Ag am Kayaknu kobol dim lamidkulagnu amu ag oolag okainab daate amge ag doyak ena iita ele amu heteb. <sup>3</sup> Amu ag Kayak, Nug kobol tutuku dim lamita, ihinignu, “Danab tutuku,” akunu heum ele amu, ag amunu ootot aqe daanna, ag aka ag oolagpanu kobol laapa tutuku daaglagnu amuib heteb. Amu ag Kayaknu ibpa tutuku bekulagnu, Nug ahilagnu, “Danab tutuku,” akunu amu ag uupig. <sup>4</sup> Juda ag anam heteb amge Kristusnu udat okaipa, ig oonigpa genab dootem ele amu, ig ib amupa danab tutuku bemut daatem. Ig dopa tutuku bekunignu ii hetem. Udat amu Kristusnu udat okaipa aaku iita meum amunu danab oh ag Kristusnu oolagpa genab dooteb aakuib Kayak Nug ahilagnu amu, “Danab tutuku,” awa ate.

<sup>5</sup> Moses nug danab ag do kobol dim lamiteg, Kayak ahilag<sub>nu</sub>, “Danab tutu<sub>ku</sub>,” a<sub>ku</sub>nu dab meteb ele amu, nug ahilag<sub>nu</sub> inam yom. “Danab laa nug kobol imu oh he<sub>ku</sub>, nug amupa bauklel daa<sub>ku</sub>.” <sup>6-7</sup> Amge danab nug oopa genab doyak ibpa danab tutu<sub>ku</sub> be<sub>ku</sub>nu, nug udat ha aokunu ii dab memanu amu, nai amunu Kayak naipa, nai daate am inam. “Na ootpa, ‘Aun nug hab atan te<sub>ku</sub>?’ aon aib ame. (Amuam nug ta, Jesus omala ne<sub>ku</sub>nu ate.) O iita “Na, ‘Aun nug mauhak abenpa no<sub>ku</sub>?’ aon aib ame.” (Amuam nug noa, Jesus omala be<sub>ku</sub>nu ate.) <sup>8</sup> Nai amuam inam ipunigte. Nai laa, nai amuam danab ag oopa genab doyak ibpa danab tutu<sub>ku</sub> be<sub>ku</sub>lag<sub>nu</sub> nai, ig nai amu mehuqtem ele amu, nai amuam na qata nidade, nai amu na odenpa amu na ootpa ele daate. <sup>9</sup> Nai amuam inam. Na Jesus Nug am Na<sub>di</sub> a<sub>ku</sub>t, na Kayak Nug mauhakpanu he edua hibaitom ootpa genab dookut amu geha Kayak na edua awiteb, ena daakut. <sup>10</sup> Amunu diig amu ig oonigpa genab doout am Kayak Nug ihinignu, “Danab tutu<sub>ku</sub>,” awa ate. Ig odenigpa ihinig oopa genab doyak amu miag aut, Kayak Nug ig edua awigte. <sup>11</sup> Kayak naipa, nai laa kobol amunu daate am inam. “Danab laa nug Kayaknu oopa genab dooku amu nug geha uda ii nema,” awa ate. <sup>12</sup> Nai amuam Juda amu iita adi ele ag am pide pide daateb ii ipunigte. Iita! Kayak laipuib, Nug am danab oh dilag Na<sub>di</sub> daate, amunu danab aun adi ag Nug onigpa eteb ele amu Nug ag ititak madaate. <sup>13</sup> Kayak naipa, nai laa daate bia. Nai amuam inam. “Danab oh ag Na<sub>di</sub> Nug edua diikunu onigpa ekulag, geha Nug ag edua diiku,” awa ate.

<sup>14</sup> Amge laa ag nuhignu oolagpa genab ii dooteb ele amu, ag atem hena, onigpa ekulag? Amu laa ag nuhignu

## Romnu Nai 10:15 35 Romnu Nai 10:21

nai ii doopig ele amu, ag a<sub>tem</sub> hena, ag oolagpa genab dooglag? Amu laa nug ag amelagpa ii mehuqeb amu ag a<sub>tem</sub> hena dooglag? <sup>15</sup> Amu laa ag mehuqak danab laa ii otialadk<sub>ulag</sub> amu ag a<sub>tem</sub> hena, nai mehuqk<sub>ulag</sub>? Kayak naipa, nai daate bia. “Danab ag madodnu Nai Ena aon goteb, ag am kobol ena dim lamidna heteb!” awa ate.

<sup>16</sup> Amge Juda danab oh ag Nai Ena imu aon, ii dim lamidp<sub>ig</sub>. Propet Jesaia nug amunu inam aum. “Na<sub>di</sub>, aun a<sub>di</sub> ag nai ihinig doona amu ag oolagpa genab doopig?”

<sup>17</sup> Amunu oopa genab doyaknu diig amu nai doyak, amu nai amunu diig amu Jesus Kristusnu nai. <sup>18</sup> Amge da od metem. Israel danab amu ag Jesusnu nai iitai doopig? Yo, Kayak nai ate amubia ag doopig. Nai amuam inam. “Ag baalag oqoti amu wan ohpa uka malom. Nai ahilag amu uka, atu batakpa waum.” <sup>19</sup> Da baula od metem. Israel danab ag nai amunu oolag iitai maitom? Moses nug od mak amunu nob ma, nug tatam Kayak ode awa, Kayak naipa inam yom daate. Nai amuam inam. “Geha da danab laala, ag Israel ag ele laipu iita, da ag diipi, ag Israel ag amunu oolag aeg beeb amu ag kobol ena, da danab amu dilagpa hepi amu ag amelag qeku. Geha da danab diig laa, ag doyak iita ele, da ag diipi amu ag Israel amu ag danab amu dilag opodilag beku.” Nug anam yom. <sup>20</sup> Anamib Jesaia nug ele oo ii bade, Nug Kayak ode awa, Kayak naipa keeke amunu nai yom daate. Nai amuam inam. “Danab laa ag da anidk<sub>ulag</sub>nu udat ii hepig ele, ag am da anidp<sub>ig</sub>. Danab laa ag dahilnu danab laala ii od madapig ele amu, da ahilagpa miag atiak tule bemi.” <sup>21</sup> Amge Israel dilag<sub>nu</sub> amu nug Kayak ode awa, Kayak naipa inam yom. “Haen elabnab da danab ag nai tapaeg ne, da di medateb ele amu,

ag onilagpa emi.”

## 11

### *ISRAEL AMEG LAA KAYAKNU OOPA GENAB DOOPIG*

<sup>1</sup> Amunu da ođ mețem. Kayak Nug danab nuhiƙud gedatōmte? Iițanab iita! Da ele am Israel ted. Da amu Abraham buđub amu Benyamin buđubpanu domi daatēem. <sup>2</sup> Kayak Nug anuƙa danab tituanata, doyațom ele, Nug ag ii gedatōm. Amu Eliasnu kaya Kayak naipa daate amu ag amu iitai dooteb? Elias nug unuqitakpa Israel danab naipa maata, Nug Kayak unuqita inam aum. <sup>3</sup> “Nadi, danab amu ag nahip propet oh aqaeg mauheg amu ag qadab nahip ele lopadpig. Da daka amu bau iiku daaiyi, ag da iupeg mauhƙulnu matidteb.” <sup>4</sup> Nug anam a amu Kayak Nug nai nuhig atem nob meum? Kayak aum. “Da danab dahilad 7,000, ag ham bupuak kayak onig Bal amu nug binag ii mepig ele amu, da ag adualati, ag dahilad daateb,” awa aum. <sup>5</sup> Amu bianab aaƙu haen imupa ele Juda oolagpan eb qak ameg laa Kayak Nug ag ehanitak okai hamu madata tituanadte. <sup>6</sup> Amu Kayak Nug danab amu ehanitak okai hamu madata tituanatōm dayeb amu Nug ag udat hepig amupa ii diiom. Ag udat hepig amunu Kayak Nug diiom daalo amu Kayak Nug ehanitak okai hamu metakpa danab diitenu kobol amu keeke hamu daalo, ehanitak okai hamu metak kobol amuam meu iita daalo. <sup>7-8</sup> Amunu ig adi akunig? Israel danab kudum ag Kayak noobpa danab tutuku daaglagnu, keeke amu aoglagnu udat okai hepig amu ag ii aopig. Amge laa, Kayak Nug tituanatōm ele amu, ag tutuku dayak amu aopig. Laa oh ag Kayak naipa, nai daate amubia ag oolag ituak ele daapig. Nai amuam inam.

“Kayak he, ag oolag amu dab mak ahilag ele niaak bia daapig. Nug he, ag amelag neekaknu elele iita daaegeg, daulag ele nai dooglagnu elele iita daapig. Ag anamib daaeg udie, gemu ele anamib daateb.” <sup>9</sup> Amu Dawit ele ahilagnu yom daate. Nai amuam inam. “Ag hobul henana amu ag dod pelempa tena qakak daateb amubia hobul ahilagpa dayeg! Ag nena qeig! Ag nob nau aweg! <sup>10</sup> Ag amelag gatatu manateg, ag neegkulagnu elele iita dayeg! Amu na hepe, ag hanhan ug ahilag maon, gomelag topieb oiyeg!” Dawit anam yom.

<sup>11</sup> Aria nai anam daate amunu da baula od metem. Ag ehednab nena qepig, amupanu ag edun ii hipaidmanate? iitanab! Ag ib ena apididpig, amupa Kayak Nug danab laa, iita adi, Israel ag anidna oolag aeg bekonu diiom. <sup>12</sup> Amu ag ib apididpig amupa Kayak Nug wanpanu danab oh dilagpa ehanatak okai hete. Ag Kayaknu Kobol ena uupig amupa Kayak Nug iita adi dilagpa kobol enanag hete. Anam amunu Israel ag edun Kayak topa dokulag haenpa amu geha danab amu oh ag enanagnab daaglag.

#### **KAYAK NUG IITA ADI EDUA DIIOM**

<sup>13</sup> Imu am da iita adi ahilagnu atem. Kayak Nug da Kristus onig awe, ag oolagpa udat hekulnu meide udimi amunu da udat imunu amu da nug binag metem. <sup>14</sup> Da amu hetemnu diig am da kobol amupa da Juda danab, ag da ele budub laipu amu, ag iita adi ag gemu Kayaknu kobol enanag aoteb anidna, ag oolag aeg beeb, kobol amupa Juda danab oolagpanu laala ag Kayak bae kudpa daaglagnu dokulagtai. <sup>15</sup> Am genab, Israel dilag na qakpa wan atu ohpan danab ag Kayak ele laipu daaglagnu elele daateb amunu dimpa Israel ag oolag edueb, Kayak Nug ag edua

diieb, keeke enanagnab beku. Amuam mauhakpanu edua hibaitak. <sup>16</sup> Bret maha nakok laa tatamnu Kayak medapeg, amu nuhig daate dayeb amu bret kunum oh am Kayaknu ele daate. Ad didi laa Kayaknu daate dayeb amu ad epekud oh amu Kayaknu ele daateb, amubia gemu Juda laipu laipu ag oolagpa genab doona, Kayaknu danab daateb amunu ag oh anamib daaglag.

<sup>17</sup> Kayak Nug danab laa, nug ad laa olip ateb, amu epekud laala otakatawa, abenlagpa olip dakud epekud diia tudite bau daateb, amubia Kayak Nug he, ag iita adi ag gemu ena bau daateb. Ag iita adi ag gemu amu ag am olip dakud epekud bia, gemu amu ag gagatag amu kobol ena ele Kayaknu aoteb, epekud didipa keeke ena aoteb bia. <sup>18</sup> Amge ag epekud otakatak, hamu daateb ele, ag amu dilag nai aib ehed apig. Ag nai ehed amananu amu ag dab mena autna aweg! Ag didi ii gumateb. Iita. Didi ag gumadte. Ag am epekudib daateb. <sup>19</sup> Amge ag inam akulag. “Kayak Nug epekud otakatom ele amu, Nug ag abenlagpa ig awika tuditom,” aon akulag. <sup>20</sup> Genab! Epekud otakatak amu ag oolagpa genab ii doopig amunu Nug ag otakatom. Ag iita adi ag Kristen bepig daateb ele amu, ag am oolagpa genab dooteb amunu ag aaku ena daateb amge ag dab mena autna aweg! Ag aib hibguita hepig. Iita, ag dab meig! <sup>21</sup> Adinu? Anuka Kayak Nug olipnab epekud otakate, abenlagpa ii daapig amubia ag, ag am olip dakud bia amu, ag oopa genab doyak uupeg, Nug ag ele otakateb, ag daatebpa ii daaglag.

<sup>22</sup> Anam amunu ag Kayaknu oo bodo etak kobol amu nuhig gagatag hak kobol ele ag anteg! Danab ag nuhig kobol di medapig ele amu, Nug gagatag kobol nuhig ag

ipuanadte amge ag iita adi ag gemu nuhig oo bodo etak kobol anidteb. Amu ag oo bodo etak kobol nuhig amu oopa daapeg amu Nug ena hadku amge ag anam ii daapeg am Nug ag otakateb, hamu daaglag. <sup>23</sup> Ele amu epekud laa ag oopa genab doyak edun aopeg amu Kayak Nug edua tuditeb, ag ele ad epekud aaku daaglag. Kayak Nug edua tuditeb daaglagnu elele. <sup>24</sup> Doyeg! Ag iita adi ag anuka amu ag olip dakud epekud daaegeg, Kayak Nug olip ad amupanu ag otakata diia, olip ad ena amupa tuditom. Ad amuam ahilagnab iita. Juda ag am olip ad ena epekudnab bia amunu Kayak Nug ag diia, edua tuditeb daaglagnu eledenab daate.

#### **KAYAK NUG ISRAEL ELE EDUA DIIKU**

<sup>25</sup> O lailad, ag aka ahilagnu dab mena, “Ig doyak binanig ele okainab,” aon amananu da ag nai anuka tonak dayom amu da geha iiku miag atiak madikulnu hetem ele amu, ag amunu ootot ii aqamanu ool daate. Da anam dootem amunu da nai anuka tonak dayom ele imu ahilagpa diig matule maditem. Amu inam. Israel danab laala oolag ituom ele, kobol amu ahilagpa dayeb eb ukeb, iita adi ag wapeg, eb qak melemel elele aoku. <sup>26</sup> Kobol anampa Kayak Nug Israel edua diiku. Amu Kayak naipa, Kayaknu nai laa daate bia. Nai anuam inam. “Ehanitak laa Sionnu udia, Kayak ode tape nak kobol Jakop topanu amu Nug aoku. <sup>27</sup> Da matu ag ele nug tituanta, nai qakamut ele amu, haen da hipunin ahilag oh uhuqen matoya, haen amupa da tituanak amunu udat dahil aaku hein malakul.”

<sup>28</sup> Juda ag Jesusnu Nai Ena doon uuna, ag Kayaknu keked daateb amunu iita adi ag ehanitak aoteb amge Kayak Nug anuka Juda ag tituanata, Nug ag alalkad dilag dab maama, ahilagnu oo mauhak ele doote. <sup>29</sup> Adinu?

Kayak Nug danab tituana, do metak kobol ha, onigpa eum ele amu, Nug nuhig dab mak dimpa amunu ii baoliṭe. <sup>30</sup> Anuka ag iita adi ag Kayak ode tapaeg neum amge gemu Israel ag Kayak ode tapaeg neṭe amunu Kayak Nug ag iita adi, ahilag nu oo gai iita doye daateb <sup>31</sup> amubia Kayak Nug Israel dilag nu oo gai iita dookunu, Nug ag iita adi, ahilag nu anam oo gai iita doyom bia, Israel ag nuhig nai tapaeg neṭe. <sup>32</sup> Anam daateb, amunu diig amunu Kayak Nug geha danab ah oh dilag oo gai iita dookunu dab maama, Nug danab oh ahilag nai tape nak kobol, amunu hipalatom daateb.

#### *KAYAK BINAG HUMAKNU NAI*

<sup>33</sup> Genab! Kayaknu dab mak doyak ele amu am bak unuqagnab daatep. Ig danab ig dab mak nuhig oh diig maṭit anidkunignu elele iitanab. Amu ig ib oh Nug dim lamidṭe ele amu, ig elelenab doognignu ele elele iita. <sup>34</sup> Amuam Kayak naipa, nai laa daate amubia. Nai amuam inam. “Aun laa nug Nadinu dab mak antom? Aun laa nug Nadi dab mak medakunu elele? <sup>35</sup> Aun laa nug tatam keeke Nadi meṭeb amu Nug edua keeke nob medaku?” <sup>36</sup> Iitanab! Nug nuka aakuib keeke oh diig daate. Nug nuka aakuib keeke ohnu Mamelag daate. Keeke oh am nuhignuib daateb. Amunu ig hanhan Nug binag metu! Genab.

## 12

#### *KAYAKNU UDAT HAKNU NAI*

<sup>1</sup> Amunu o lailad, da Kayaknu oo gai iita doyak kobol dab mein, ag ag bedulag, ahilag dab mak, ag oolag amu ag bedulag laa oh ele aon, danab ag dod main Kayak medateb amubia, ag ag bedulag, ahilag dab mak, ag oolag amu ag bedulag laa oh ele, nuhig udat hekunu Kayak metaglag nu



unuqadtem. Ag bedulag, ahilag dab mak, ag oolag amu ag bedulag laa oh ele opia awak, Kayak oo niite bia ele Nug meteg! Kayak Nug ahilagnu keeke okainab ha malom amunu ag bedulag, ahilag dab mak, ag oolag amu ag bedulag laa oh ele ag edun, Nug metaglagnu am keeke okaita? Iita. <sup>2</sup> Danab laa ag wan imupan kobolnuib guatak oiteb amubia aib oipig. Iita! Kayak Nug heeb, ahilag dab mak ena bau beeb, ag oiyak baupa oiyeg! Ag anam hena amu ag Kayak, Nug ag adi hekulagnu dab mete amu ag dooglag. Ag amu doona amu ag Kayak Nug adi haknu ena doote, adi haknu enanag doote, adi haknu eledenab doote amu ag amu ele dooglag.

<sup>3</sup> Kayak Nug da ehanitak okai hamu medom amu da amupa ag anen anen amelagpa atem. Ag aka anen anen ahilagnu amu laa oh edatak, ag enanag daateb aib doopig. Iita, Kayak Nug oopa genab doyak ahilag ag anen anen mate, ag udat heteb ele amu, ag amu dab menan, ag aka anen anen ag ahilagnu dab mak tutuku aon oiyeg! <sup>4</sup> Ig danab ig oh anen anen amu ig bedunig pide pide. Aria ig bedunig pide pide amu ag am laih kudum amu laih kudum amu ag ahilag udat ele laipu iita daateb. <sup>5</sup> Amubia ig oh Kristus ele tamanidta laipu daatem, ig danab nug bedu laih kudum amge bedu amu laipu daate, amubia ig am kudum amge laipu daatem. Bedu laipu oopanu laih naunau ag nug ehanidnana daateb, amubia Kristen tamaniak nug ele anam daate. <sup>6</sup> Kayak Nug ig anen anen udat laala hekunignu ehah mekom amunu danab laa nug nai mehuqte amu nug oopa genab doyak nuhig dim lamiita, nai mehuqad! <sup>7</sup> Aria danab laa nug laikud laa ehanadte amu nug laikud laa ehanatak udat genab had! Danab laa nug laikud keeke ipuanadte amu nug ipuanatak

uḁat tutuku had! <sup>8</sup> Danab nug laikud, dab mak ahilag maḁ adate amu nug dab mak maḁ etak uḁat tutuku had! Amu danab laa nug layag keeke medate amu nug keeke hapiak metad! Danab laa nug gumak uḁat hete amu nug uḁat amu gumakunu oo ahak enapa gumad! Danab laa nug layagnu oo gai iita doya ehanidte amu nug oo gamag ahak okai enapa ehaniḁad!

### *LAYAGNU NUG OO MAUHAKNU KOBOLNAB*

<sup>9</sup> Ag lailkad dilag genab huana oolag mauhad! Ag aib ham bupuk bia hepig. Ag kobol nau oh di maḁana amu ag kobol ena amuib aḁan autna aweg! <sup>10</sup> Amu ag lailkad oolag maḁan, ahilagnu oolag mauhad! Ag oh nug binag metak elelenab heig! <sup>11</sup> Amu ag aib bahilag yom. Ag hanhan uḁat gagatag heig! Ag anam hebepeg amu Kayak Oudi ag maḁ aḁeb, Naḁinu uḁat hekulagnu oolag meteg! <sup>12</sup> Amu ag Naḁi ehanadkunu ameg meteb ele amu, ag amunu dab menan daanna, ag oolag gamag ahad! Ug laa ahilagpa uḁieb amu ag gagatag dayeg! Amu ag hanhan unuqiteg! <sup>13</sup> Kayaknu danab laa ag keekenu tutu daapeg amu ag ehanateg! Danab laihnu, ag ii doyardteb ele amu, ag uḁipeg, ag diin atog noadkulagnu dab menan heig!

<sup>14</sup> Danab laa ag ahilagpa ehed hepeg amu ag Kayak Nug danab amu ehanata, kobol ena ahilagpa hekunu unuqiteg! Ag aib Nug nob nau madakunu unuqidpig. <sup>15</sup> Danab ag oolag gamag aheb, ag ele oh oolag gamag ahad! Danab gaapeg, ag ele oh gayeg! <sup>16</sup> Amu ag aka ahilagnu dab meteb amubia amu ag lailkad dilag dab mena anam heig! Ag aka ag am binalag ele amu, ag anam aib dab mepig. Iita. Amu ag danab binag okai iita ele oh oiyege! Ag aka ahilagib dab mena, “Da daka iiku doyak ena ele,” aib apig.

<sup>17</sup> Amu laa ag ahilagpa ehed laa hepeg, ag aib nob mena, amu dilagpa ehed hepig. Ag danab oh amelagpa kobol enapa oiglagnu dab mak aweg! <sup>18</sup> Madod dayaknu amu ag adi adi hena, madod ba daakunu daate amu ag amu henana, laa dilag ele madod daaglagnu ib daate ele amu ib amu dim lamiteg! <sup>19</sup> O lailadnab, laa ag ahilagpa ehed hepeg amu ag nob aib mepig. Uupeg, Kayak nukā heeb, ag hipuninnu bu aqak, Kayak epegpanu udite amu, ag amu aoglag. Amuam Kayak naipa, nai daate amubia. “Nob edua maknu amu dahil udat. Da daka geha nob nau madakul.” Nadi Nug anam ate. <sup>20</sup> Amge Kayak Nug udat amu hekunu Kayak naipa, nai daate ag amubia hekulag. Nai amuam inam. “Keked nahip enug qeeb amu na e mete! Amu baag qada eteb, lenu heeb, na le mete! Na anam hepe amu geha nug kobol nau nuhig amunu uda neku,” awa ate. <sup>21</sup> Aria na aib hepe, kobol ehed na tonitom. Na kobol tutuku henana amu na kobol nau qepe nad!

## 13

### WAN TOLIAK WAAPA DAYAKNU NAI

<sup>1</sup> Wannu toliak udat amu nukā ii beum. Iita. Wannu toliak udat oh amu Kayak nukā meum amu danab ag udat amu heteb ele amu, Kayak Nug ag maate heteb amunu danab oh ag ag waalagpa dayeg! <sup>2</sup> Amunu danab ag wannu toliaknu do tapaeg nete amu ag Kayaknu kobol ele aaku tapaeg nete. Amu danab ag kobol anam heteb amu ag geha ahilag hak nau amunu nob nau aoglag. <sup>3</sup> Adinu? Wannu toliak danab ag danab kobol tutuku heteb ele ag ag badadkulagnu ii daateb amge ag danab kobol tutuku ii heteb ele, ag badaglagnu daateb. Amunu ag wannu toliak nug ii badidkulagnu dayeb amu ag kobol tutukuib

heig! Ag anam hena, ag wannu toliak, nuhigpa binalag aoglag. <sup>4</sup> Ag binalag aoglagnu diig am danab wannu toliak udat hete ele amu, Nug ele am Kayaknu udat danab, ag ehanateb ena daaglagnu daate. Amge ag kobol tutuku ii henana amu ag badaglag. Ag dooteb, nuhig gagatag amu keeke hamu iita. Udat amu Kayak Nug metom amunu danab ag kobol tutuku ii hepeg, nob nau madakunu daate. <sup>5</sup> Amunu ig wannu toliak waapa daatun! Ig nob nau awaknuib badata, nug waapa ii daamta. Iita. Ig tutuku oiyaknu ulum, Kayak Nug amu ig oonigpa meum ele amu, dab mak amu ig anam hekunignu ele ipunigte amunu, diig amunu ele ig wannu toliak waapa daatu!

<sup>6</sup> Laa ele amu wannu toliak danab ag ele Kayaknu udat danab daateb, ag udat amu ena gokunu dab medteb ele amu, diig amunu ele ag ag takis madateb. <sup>7</sup> Aria ag keeke idu idu wannu toliak mataglagnu daate amu ag mataglag. Wannu toliaknu takis awaknu danab amu ag amunu men dodo aoglagnu dayeb amu ag mateg! Ag danab laa waapa daan doon amu ag aaku nug waapa dayeg! Amu ag danab laanu oolag metan amu ag oolag nug aaku meteg!

#### DO TUTUKU DIM LAMITAKNU MEU AM OO MAUHAK

<sup>8</sup> Ag danab laanu keeke edua metaknu aona amu ag edun metaglagnu haen anidna, ag aib uupeg, hamu dayom. Laipuib, ag laa dilagnu oo mauhak kobol amu ag hepeg, iita mekunu elele iita amunu ag amu hekulagnu haen oh dab meteg! Adinu? Aun nug kobol anam dim lamidte amu nug do oh amu elele medte. <sup>9</sup> Do imu oh, “Na gapai kobol aib heme; na danab dug aib ome; na yab aib heme; na layapnu keeke amen aib qeum,” do amu, amu do laala ele daateb, amu oh dilag iki tamaniak do okai laipu

daate amu inam. “Na naka nahipnu oot mauhte, amubia na laipad dilag oot mauhad!” <sup>10</sup> Danab nug layagnu oo mauhte amu nug layagnu ehed laa ii hete amunu danab laa nug layagnu oo mauhte, nug amu do laa oh ele tutuku dim lamidte.

<sup>11</sup> Laa ele amu ag haen gemu ig daatem ele imu ag dooteb, gemu am ag niak uuna ahaglagnu haen daate. Amu ag dooteb, anuka ig baubunab oopa genab doyak aomut amu Kayak ig edua awigkunu haen uma dayom bia amge gemu am haen amu nakok gukuikak doum daate. <sup>12</sup> Tuqan iita mekunu heehe, wagdak bekunu miagnab daate amunu ig gatatanu kobol oh di madatta amu ig amahlaknu bannu bala aot bedunigpa metu! <sup>13</sup> Amu ig danab nug amunpa tutuku kobolpa oite bia oitu! Ig aib godak, qid ena iita hetata amu ig kaaka qaknu le gagatag nau ele lamut. Ig aib gapai kobol hetata amu dubutid kobol laala ele hemut. Ig aib nug aigtata amu laa dilag keekenu amenig ele qeum. <sup>14</sup> Ag amu oh aib hepig. Ag Nadi Jesus Kristus ele ou qena, nuhig kobol ele aon oiye! Am ag bedulagnu dab mak nau dim lamidkulagnu aib dab mepig.

## 14

### *KRISTEN AG LAILKAD II EPEDIADMANA*

<sup>1</sup> Aria, danab laa nug oopa genab doyak nuhig gagatag iita dayeb amu ag nug aon tamaniak ahilag oopa omalna noig amge ag aib dab mak laala ele nug ele nai apeg on apeg doum. <sup>2</sup> Danab laa nuhig oopa genab doyak am gagatag ele nug e oh lanana, Kayak noobpa ena daate doote. Amu danab laa nug oopa genab doyak nuhig gagatag iita ele amu, nug Kayak noobpa ena daakunu

nug dod̄ tepu ii lamanu doote amunu nug dod̄ tepu ii late. <sup>3</sup> Danab nug e oh late ele nug danab dod̄ tepu ii late ele, nuhignu aib dab mak nau awom. Amu danab dod̄ tepu ii late ele nug danab e oh late ele nuhignu, “Am hipunin hete,” anam aib dab meum. Iita. Kayak Nug danab amu ele am tituanom daate. <sup>4</sup> Na am danab aun amunu na danab laanu udat nidnu nai ehed̄ nuhignu atem? Am nahip keeke iita, nug am Kayaknu udat danab. Nug udat nuhigpa gagatag hipaidkutai o iita nuhig udatpa na qekutai, amu oh am nuhig gumak danabnuib keeke daate amge nug geha gagatag hipaidku. Adinu? Nadi Nug nuk̄a gagatag qeteb amu nug gagatag daaku.

<sup>5</sup> Aria danab laa nug ded̄ laipunu, amuam ded̄ gunnab, ded̄ laala edatak, doote. Amu danab laa nug ded̄ oh am idu laipu anam doote. Amu ag anen anen ag kobol amunu amu ag ahilag dab makpa adi hekulagnu ag doon autna aweg! <sup>6</sup> Amu danab laa nug ded̄ laanu gun doote, danab amu nug Nadinu dab maama anam dab mete. Amu danab laa nug e oh late, nug Kayaknu, “Ena ha medom,” anana late amunu nug ele Nadi dab maama anam hete. Aria danab laa nug e oh ii late, nug ele Nadinu dab maama, tepu laa lamanu gun mete amupa nug ele am Kayaknu, “Ena ha medom,” awa ate. <sup>7</sup> Amu ig dootem, oonigpanu danab laipu laa nug bau dayak nuhignu amu nuk̄a nuhig keekeib iita. Danab laipu laa nug mauhak nuhig amu nuk̄a nuhig keekeib iita. <sup>8</sup> Amunu ig bau daatem dayeb amu, keeke amuam Nadinu keeke. Ig mauhtem dayeb amu, keeke amu ele am Nadinu keeke amunu ig bau daagnigte, o iita mauhkunigte, amu oh am keeke okai iita, ig am Nadinuib daatem.

<sup>9</sup> Kristus Nug danab ag mauhpig, danab ag bau

daateb ele, amu oh dilag Nađi daakunu, diig amununab mauhowa, eđua hibaitom. <sup>10</sup> Ig oh geħa Kayaknu heťodiak abenpa daagnig amunu na ađinu layap epeditem? Ađinu na layapnu keeke hamu bia dooťem? <sup>11</sup> Kayak naipa ig oh nuħig heťodiakpa daagnignu nai daate am inam. “Nađi ate. ‘Da genab bauklel daatem amubia geħa danab oh ag genab gatelag qaun ona, da binal mekulag. Amu danab oh ag dahilnu, “Nug am Kayak genab,” aon akulag.’” <sup>12</sup> Amunu ig oh anen anen geħa kobol oh hetem elenu diig amu Kayak amegpa akunig.

<sup>13</sup> Amunu ig lainkad laa dilag kobol naunu amu ig ii epediadmata. iita. Ig lainig laa hipuninpa na qemanu dab meta, keeke laa ig heput na qekunu ii hematanu dab metat oitu! <sup>14</sup> Amu da am Nađi Jesusnu danab amu Nug da ipuniđa auta awe, da e laipu laa nug nuħa Kayak amegpa am ehed iita dooťem. Amge danab nug nuħa keeke aťen laa amunu nug ehed ele dooťe, nuħigpa aakuib ehed daate dooťem. <sup>15</sup> Aria laa nug keeke laa lakunu ehed dooťe dayeb amge na e amu laťem amu kobol nahip amupa na hepe, na layap nug oopa guitak dookũ amunu na dookũt, kobol amupa na layapnu oot ii mauhte. Amu Kristus Nug na layap amu eđua aokunu mauhom amunu na nahip e lanak kobolpa nuħig oopa genab doyak aib hepe nauhom. <sup>16</sup> Amu ag keeke laalanu ena dooťeb ele amu, ag lapeg, danab laala anam ii dooťeb ele, ag amunu nai nau laa amananu ag dab meig! <sup>17</sup> Ađinu? E lanak amu le lanaknu kobol ele a Kayaknu do mađodnu diig iita. Kayaknu do mađod diig amu tutuku oiyak kobol, mađod kobol amu oo gamag ahak kobol ele. Keeke amu oh am Kayak Ouđi Nug he beťe. <sup>18</sup> Danab laa nug Kayak waapa dayaya, kobol amu dim lamidťe ele amu, geħa Kayak Nug kobol nuħignu

oo enanag dayebeb amu danab ag ele nuhignu amu danab ena dooglag.

<sup>19</sup> Amunu ig kobol laala, ig kobol amu dim lamitut, danab laa ele madod daatem amu, kobol laala ig kobol amu dim lamidtata, ig lainkad dilag oopa genab doyak gagatag qedtem ele amu, ig kobol amuib dim lamidta hekunig.  
<sup>20</sup> Ag aib e lanaknuib dab mena, Kayaknu udat hepeg nauhom. Am genab, keeke oh am lanaknu ena amge na keeke laa lae, amu he, danab laa nug oo eedak doya, na qete dayeb amu na aaku kobol elele ii hetem. <sup>21</sup> Amu kobol elele haknu am inam. Na dod tepu lape, na layap nug na anita na qeku dayeb amu na aib dod tepu lame. Amu wainnu ele anam dayeb amu na aib lame o keeke laa ele anam dayeb amu na aib heme.

<sup>22</sup> Na Kayak noobpa e lanaknu adi ootpa genab dootem amu na amu hekutnu elele amge danab oh nahip dab mak dim lamidkulagnu aib heme. Danab laa nug keeke laanu ena dab mete, dab mak nuhig keeke amunu ii hetodidete amu nug oo gamag ahak ele daate. <sup>23</sup> Amge danab laa nug keeke laipunu oo adit dayeye late amu nuhigpa am hipunin. Adinu? Nug oopa genab ii doyaya late. Keeke oh danab ag oolagpa genab ii doona heteb, amuam hipunin.

## 15

### *KRISTUSNU DAB MAK DIM LAMITAKNU NAI*

<sup>1</sup> Danab ig onigpa genab gagatag dootem ele, ihinig udat am danab ag oolagpa genab gagatag ii dooteb ele ag ehanadkunignu daate. Ag aka ahilag ug maoglagnu elele iita amunu ig ehanadta, ug ahilag maotu! Amu ig ika, ig adi hekunignu oonig daate amu, ig ihinig dab mak amuib aib dim lamidta oimut. <sup>2</sup> Ig anen anen ig lainkad



ag ena bekulagnu ehanadput, ag geha gagatag aoglag.  
<sup>3</sup> Adinu? Kristus ele, Kayak naipa, nai nuhignu daate, Nug  
 nuka nuhig dab mak ii dim lamidtom. Nai amuam inam.  
 “Danab ag Kayak nahipnu nai nau ateb, ahilag nai nau  
 amu da tonidte.” <sup>4</sup> Danab ag Kayak nai yaapig amu ig  
 nai amupa ulum aognignu amu ig nai amu eb qetata, ig  
 gagatag amu ehanitak ele aotem amu ig amu aot gogpa  
 tekunignu dab mekunignu amu ag anuka keeke oh Kayak  
 naipa daate amu yaapig. <sup>5-6</sup> Amu ig Kayak, Nug am oo  
 madod ele dayak amu gagatag dayak elenu diig amu Nug  
 ag ehanateb, ag Kristus Jesus tutuku dim lamidna, ag dab  
 mak laipu adan oinna, ag oolag laipu daanna, odelag oh  
 ob, ag Kayak, Nug am ihinig Nadi Jesus Kristus Mameg,  
 Nug binag mekulagnu oonig daate.

<sup>7</sup> Ag anam daaglagnu am ena amunu Kristus Nug Kayak  
 binag medakunu dab maama, Nug ag diiom bia ag oh  
 ag lailkad diipeg, oolag laipupa dayeg! <sup>8</sup> Da inam atem.  
 Kristus, Nug Kayaknu nai elelenab medakunu, Kayak Nug  
 ig alankad amelagpa nai qaka aum, nai amu ele meu miag  
 atiknu, Kristus Nug Juda dilag begbeg danab beum. <sup>9</sup> Nug  
 diig adit amupa heum amu ita adi ag Kayaknu oo gai  
 ita doyak kobol anidna, Nug binag mekulagnu ele heum.  
 Kayak naipa, nai amunu inam daate. “Diig amunu da  
 geha ita adi dilagpa na onin mehuqkul. Da geha ahi  
 eten, na onin humakkul.” <sup>10</sup> Kayak naipa, nai laa am inam.  
 “Ita adi ag amu danab Kayak tituanatom ele, ag oh oo  
 gamag ahak doyeg!” awa ate. <sup>11</sup> Aria Kayak naipa, nai laa  
 ele am inam. “Ita adi ag oh Kayak binag meig! Danab  
 oh ag Nug binag meig!” awa ate. <sup>12</sup> Amu Kayak naipa  
 Jesaia nug ele nai laa inam yom. “Genab, Jesi budubpanu

danab laa ba dayaya, Nug ge<sub>h</sub>a i<sub>i</sub>ta a<sub>d</sub>i dilag gumi<sub>t</sub>a danab daa<sub>k</sub>u. Nug beeb amu i<sub>i</sub>ta a<sub>d</sub>i ag ge<sub>h</sub>a nuhig<sub>n</sub>u oolag<sub>p</sub>a genab doon, nuhig<sub>p</sub>a ehanit<sub>a</sub>k aoglag<sub>n</sub>u oolag ma<sub>d</sub>o<sub>d</sub> ele ameg me<sub>k</sub>ulag.” <sup>13</sup> Amu ag Kayak, Nug am ma<sub>d</sub>o<sub>d</sub> doya gagat<sub>a</sub>g dayak<sub>n</sub>u dab mak diig amu, ag nuhig<sub>n</sub>u oolag<sub>p</sub>a genab dooteb, amupa Nug heeb, ag oolag<sub>p</sub>a oo gamag ahak ok<sub>a</sub>i amu ma<sub>d</sub>o<sub>d</sub> ele na<sub>d</sub>i dayed! Ag anam doon daanna amu Kayak Oudi gagat<sub>a</sub>g<sub>p</sub>a ag buti a<sub>d</sub>i hab at<sub>a</sub>nnu keeke aoglag<sub>n</sub>u ma<sub>d</sub>o<sub>d</sub> ele ameg mena daaglag.

*PAULUS NUG IITA ADI DILAG UDAT HEUM*

<sup>14</sup> O lailad, da da<sub>k</sub>a am da ag haen oh kobol ena he<sub>t</sub>eb, ag doyak ena ok<sub>a</sub>inab aopig amu ag lail<sub>k</sub>ad laala dab mak ena mataglag<sub>n</sub>u elele daateb amu da amu ohnu ool<sub>p</sub>a genab dootem. <sup>15</sup> Amge da nai laala ahilag<sub>n</sub>u nakok gagat<sub>a</sub>g yaaladmi amu da nai amupa dab mak ahilag ma<sub>d</sub> edak<sub>u</sub>lnu dab memi. Adinu? Kayak Nug da ehanit<sub>a</sub>k ok<sub>a</sub>i hamu meda he, <sup>16</sup> da i<sub>i</sub>ta a<sub>d</sub>i ag oolag<sub>p</sub>a u<sub>d</sub>at he<sub>k</sub>ulnu Kristus Jesusnu u<sub>d</sub>at danab bemi. Da he<sub>p</sub>i, i<sub>i</sub>ta a<sub>d</sub>i ag Kayak Nug oo daate amubia daaglag<sub>n</sub>u, Kayak Oudi Nug heeb, ag opia awak danab bena daapeg, da ag diie, Kayak medak<sub>u</sub>lnu mana met<sub>a</sub>k danab bia bein, Kayaknu Nai Ena mehuq<sub>t</sub>em.

<sup>17</sup> Amunu da Kristus Jesus ele tamanida daadda, da dayeye, u<sub>d</sub>at heinne, da Kayak u<sub>d</sub>at he<sub>t</sub>emnu amu da ool gamag ahak<sub>u</sub>nu elele. <sup>18-19</sup> Da keeke laalanu amu ii madipa. Iita. Da keeke laipunuib madik<sub>u</sub>l. Amuam Kristus Nug dahil naipa, dahil u<sub>d</sub>atpa ele Nug he, da eponak keeke danab he<sub>k</sub>unu elele iita diigdiig hei, danab ag amunu gagat<sub>a</sub>g anidpig amupa amu Kayak Oudi nuhig gagat<sub>a</sub>g<sub>p</sub>a ele Nug iita a<sub>d</sub>i omalate, Kayak topa doeg, ag nuhig nai dim lamid<sub>k</sub>ulag<sub>n</sub>u heum amu da amunuib madik<sub>u</sub>lnu

hetem. Nug anam ehanidom amunu da Jerusalem apa dig mein, Kristusnu Nai Ena mehuqege, aben ohpa ele oii uke uke, Ilirikam abpa batami. <sup>20</sup> Da udat amu heinne amu da danab laa ag tatam tamaniak buueg beum daate amupa nai mehuqkulnu ool ii daate. Iita, da aben laalapa Kristus onig ii doopig ele, ahilagpa Nai Ena madikulnu amu da ool okainab daate. <sup>21</sup> Amge amuam Kayak naipa, nai daate amubia. Nai amuam inam. “Danab ag nuhignu aeg ii doopig ele ag geha Nug anidkulag. Amu danab ag nuhig nai ii doopig ele ag geha doon autna aoglag.”

**PAULUS ROM ANTOWA SPEN GOKUNU DAB MEUM**

<sup>22</sup> Da udat amu heinne daami amunu da ag Rom daateb, da ahilagpa gokulnu dab meiyi, haen kudum udat amu da okulidom.

<sup>23</sup> Amge gemu amu da laih ipa amu udat hein malami. Amu da matu ami, da mad kudum ahilagpa gokulnu dab metami <sup>24</sup> amu da geha wan laa onig Spen apa gokulnu dab metem amunu da apa ugeke, da tatam ag anatoya gokul. Da ag ele apa nakok daat, ool meeb amu ag da ehanidpeg, Spen gokul. <sup>25</sup> Amge geha iiku amu da Kayaknu danab Jerusalem daateb amu ag ehanadkulnu gotem. <sup>26</sup> Adinu? Makedonia Grik danab ele ag Kayaknu danab Jerusalem daateb ag keekenu tutu men daateb amu, ag ehanadkulagnu keeke nakok laa qag maadna, ag mepeg gokunu maidpig. <sup>27</sup> Am genab ag oolag ena daye, aka ahilag dab makpa anam hepig amge ag Jerusalem dilagnu keeke nob edua metak bia hekulag. Adinu? Kristusnu nai nug Juda ahilagpanu aha, iita adi dilagpa ukom amunu iita adi ag bedunignu keeke, amupa Juda danab keeke nob

edun maṭaglag am ena. <sup>28</sup> Amunu da uḍat amu hepi gog teḱunu goṭem. Da keeke ena amu Jerusalem danab da epelpanab maṭoya amu da geḥa Spen gokulnu ugeḱe, ag ele anaṭoya gokul. <sup>29</sup> Da dooṭem, geḥa Kristusnu ititak ena dahilpa naḍi dayebēb, ag gumate wakul.

<sup>30</sup> O lailad, da ag ihinig Naḍi Jesus Kristusnu, amu Kayak Ouḍinu oo mauhak, ihinignu dooṭe, amu ele dab mebepeg, ag da ele oh dahilnu Kayak unuqidkunignu ool daye, oḍ madaṭem. <sup>31</sup> Amu ag Kayak da eḥaniḍa, Juda laala ag oolagpa genab ii dooṭeb ele amu, Nug da ag epelagpanu edua awidkunu unuqiteg! Ag Kayak Nug heeb, danab nuhiḱud Jerusalem daateb ele amu, da uḍat ag eḥanadkunu heḱulnu heṭem imu amu ag amunu oolag heḱunu unuqiteg! <sup>32</sup> Anam dayeb amu Kayak Nug ele oo dayeb amu da ool gamag ahak ele ahilagpa wain, ag ele haen tutu laa daat, hik aokul. <sup>33</sup> Kayak, Nug am maḍoḍ diig, Nug ag oh ele daaglagnu ool daate. Genab.

## 16

### PAULUS NUG DANAB AH KUDUM HUMITAK NAI MATOM

<sup>1</sup> Ig apinanig Pibi, nug ahilagpa goḱu amunu nug ukebeb, ag oṭaimananu da nug onig iiku dien, ag ipuanadṭem. Nug nuhiḱ uḍatpa amu Senkria kristen tamaniak eḥanidṭe. <sup>2</sup> Nug ag ele oh ag Jesusnu oolagpa genab dooṭeb amunu ig Kayaknu danab, ig laa nug bia eḥanidkunignu dooṭem, amubia ag nug aon eḥanidkulagnu oḍ madaṭem. Nug keeke laanu oo ug dayeb amu ag eḥaniteg! Aḍinu? Nug danab kuḍum laa eḥanaṭom amu da ele eḥaniḍom.

<sup>3</sup> Amu Prisila Akwila ele, Kristus Jesusnu udatpa ig kadoi laipu amu, ag dahil humitak nai a mateg! <sup>4</sup> A da mauhpanu amu a mauhak ib odepanab oiiya ehanidpid. Da a amelahpa, “Ena hepid,” awe atem amge da daka anam ii hetem. Iita! Iita adi dilag kristen tamaniak oh ele ag anam dooteb. <sup>5</sup> Amu humitak dahil kristen tamaniak a laulahpa qag meteb amu ele mateg! Amu ag humitak dahil Epinitas, da layalnab, nug ele meteg! Nug tatam Asia wanpanu danab oh ag oolagpanu Kayak baegpan danab beum. <sup>6</sup> Amu ag humitak dahil Maria meteg! Nug udat nadi ag ehanadkunu heum. <sup>7</sup> Amu ag humitak dahil Andronaikas Junias ele mateg! A am da ele ig oh Juda danab amu ig haen laipu oh mani guitakpa daamut. Totol danab ag danab adit amu ag a doyatna autna aoteb. Amu da Kayak baegpan danab ii bein daaiyi, a tatam Kristen bepid. <sup>8</sup> Amu ag humitak dahil Amplietas meteg! Nug am Nadinu kobolpa dahil layamnab. <sup>9</sup> Ag humitak dahil Eban meteg! Nug am Kristusnu udatpa ehanitak ihinig laa. Amu humitak dahil Stekis ele meteg! Nug am da layalnab. <sup>10</sup> Amu ag humitak dahil Apelis meteg! Nug am Kristus genab dim lamidkunu amu onig ele. Amu ag humitak dahil danab Aristobulas laugpanu ele mateg! <sup>11</sup> Ag humitak dahil Herodion meteg! Nug am da ele i Juda danab. Amu ag humitak dahil Nasisas laugpanu danab laala ag Jesusnu oolagpa genab dooteb ele amu, ag mateg! <sup>12</sup> Ag humitak dahil Traipina amu Traiposa ele mateg! A Nadinu udatpa wagai metep. Ag humitak dahil Pesis meteg! Nug am da layalnab. Nug Nadinu udat okainab heum. <sup>13</sup> Amu ag humitak dahil Rupus meteg! Nug Nadi dim lamidkunu amu danab enanag. Nug anig ele nug hanhan dahilnu ele da anil bia hete amu, nug ele humitak

dahil meteg! <sup>14</sup> Amu ag humitak dahil Asinkritas, Pligon, Hemis, Patobas, Hemas amu ag lailkad ag ele oh daateb amu, ag ele humitak dahil mateg! <sup>15</sup> Ag humitak dahil Pilolaga Julia, Neraias, nug apinag, amu Olimp as ele, amu Kayaknu danab oh ag ele daateb, amu oh ele mateg! <sup>16</sup> Ag Kayaknu danab dilag kobolpa ag oh lailkad ele anen anen humateg! Kristusnu tamaniak oh ag ahilag humitak ag madateb.

#### *BATAKNU NAI*

<sup>17</sup> O lailad, da ag danab laala tamaniak kabolinna, nai ag aopig, amu tapaeg nete ele, ahilagnu dab mena autna aoglagnu, dab mak ahilkad mad edatem. Danab amu ag kobol ehed amupa ag danab hateg, nena qeteb amunu ag danab amu dilagnu awaidna, dekadnana dayeg! <sup>18</sup> Danab amu ag ihinig Nadi Kristusnu udat ii hetebe. Iita, ag am bedulagnu dab mak nau amuib dim lamidtebe. Amu nai nau itag ele amupa ag danab kobol nau ii dootebe ele amu, ag bupualadtebe. <sup>19</sup> Ag Rom danab ag Kayak ode dim lamidtebe ele, nai amu danab oh ag doon malapig daatebe amunu da ahilagnu am ool gamag ahate amge da ag kobol enanu doona autna aona amu kobol tutuku iitanu amu dab ii melobnu ool okai daate.

#### *DANAB LAALA AG ROM DILAG HUMITAK NAI MEEG UKOM*

<sup>20</sup> Haen elab iita Kayak, Nug am madod diig amu, Nug geha Satan tapeb na, ag baelag waapa daaku. Nadi Jesusnu ehanitak okai hamu megte ele amu ahilagpa dayad!  
<sup>21</sup> Dahil udat laipu Timotius, nug ele ag humadte. Lusias, Jeson amu Sosipata ele, ag da ele ig oh am Juda danab amu, ag ele ag humadtebe. <sup>22</sup> Aria, da amu Tetias, da Paulus ode awe, nai imu ahilagnu yaami amu, da Kristus onigpa ag

humadtem. <sup>23</sup> Amu Gaias, da nug laugpa daaiyi, nug da atog noidte, kristen tamaniak nug laugpa ele qag meteb amu, nug ele ag humadte. Amu Erastas, nug am ab imunu men dođo gumak danab amu ig lainig Kwotas ele a ele ag humadtep. <sup>24</sup> [Ihinig Nađi Jesus Kristus nuhig ehanitak okai hamu metak amu ahilagpa dayad! Genab.]

*KAYAKNU BINAG MAKNU NAI*

<sup>25</sup> Ig Kayak binag metu! Nug da Jesus Kristusnu Nai Ena mehuqtem bia amu nai lokumak anukanu dayom, nai amu ate amubia ele Kayak Nug ag ahilag oopa genab doyakpa gagatag daaglagnu ehanadkunu elele daate. <sup>26</sup> Nai lokumak dayom ele amuam genab lokumak dayom amge gemu propet dilag yakpa, nai amu aaku miag atiom. Amu Kayak Nug a, ig danab idu idu oh, ag oolagpa genab dooglagnu, ag Nug ode dim lamidkulagnu nai amu mehuqtem. <sup>27</sup> Kayak, Nug nukā doyak ele amu, Nug hanhan Jesus Kristus nuhig udatpa hanhan binag awad! Genab.

## KAYAKNU NAI Tituanak Bau

The New Testament in the Nobonob Language of Papua New Guinea  
Nupela Testamen long tokples Nobonob long Niugini

copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 27 Sep 2019 from source files dated 27 Sep 2019

ed374bb9-d819-53d1-a85b-f86cce3892e1